

صنوع الضحك

حنان لاشين
أم البنين



دار القمي
للنشر والتوزيع





ممنوع الضحك

ودار قد حوت ذرراً... وذور السطو ملحوظة
لهذا قلت تحذيراً... حقوق الطبع محفوظة

اسم الكتاب: ممنوع الضحك

اسم المؤلف: حنان لاشين (أم البنين)

رقم الطبعة: الأولى

السنّة: 2014 م / 1435 هـ

رقم الإيداع: 15676 / 2014

عدد الصفحات: 252 صفحة

القياس: 14 × 20 سم



 <https://www.facebook.com/dar.alqimari>

 <https://twitter.com/daralqimari>

 <http://www.alqimari.com>

 info@alqimari.com

 رمز بريدي: 11161 كود: 11511 ص.ب 113

ممنوع الضحك

حنان لاشين

بِسْمِ اللَّهِ الرَّحْمَنِ الرَّحِيمِ

ممنوع الضحك

أحياناً، تصدر عنا تصرفات وحركات وإيماءات تلقائية،
لا نُلقِي لها بالاً،

وربما لا ننتبه للعيون التي تراقبنا،

ولو راقبنا أنفسنا، لضحكنا كثيراً

دعوني أشارككم وأنا أراقب نفسي وأراقبكم

وممنوع الضحك



احترس من المرأة



كنت حين

جملة خاطفة تخرجها الزوجة بمهارة وهي تجلس بهدوء

مصطنع على كنية الأنثريه

بعد تأخر الزوج وتأكيدها أنه كان بيضحك

وهو واقف مع زميله في الشارع

ساعة ونص وهي فلقانة

(ننصح بالاتجاه فوراً لأحد الغرف مع اصطحاب الأطفال

وغلق الباب حتى تهدأ).

يا بختك

جملة حقودة موجهه للزوج

وهو يستعد للخروج مع رفاقه لمشاهدة الماتش في النادي ..
تكون الزوجة في حالة من الغليان تحمل مخلوق صغير يصرخ
مع وجود كائن آخر يبشده في هدومها
ونلاحظ ضيق العين اليمنى واتجاه الفم للناحية اليسرى
مع هز الرأس بهدوء وهي تتكلم
(ننصح بعدم الخروج حرصًا على سلامة الزوج).



عاوزين إيه من زفتة

جملة موجهة للأبناء ...

تحاول فيها الأم التعبير عن حالتها

بعد يوم طويل من العمل الشاق بدون راحة

ننصح في هذه الحالة بالهروب من البيت



هاااااااااااا

صرخة عالية تخرج تلقائيا عند افتتاح صرصار للمجال الأسري

تحاول الزوجة من خلالها إخراج ميول إجرامية

وتخرج طاقات مكنونة بقتل أحد أعداء الأسرة

(ننصح بالتصفيق لها وتشجيعها).



الصمت

الصمت شيء مقلق ويسبق العاصفة وتصاحبه آثار سلبية

تظهر بوضوح على الأبناء

(محتاجين يستحموا)

والمطبخ

(المواعين ماتغسلتش)

ننصح في هذه الحالة بالمسح على رأسها بحرص والطبوبة

على كتفها بحنان

والسماح لها بالبكاء

(خلاص هي ضربت وكان لازم تفصل علشان تقدر تكمل)



عاوذة وُرد ❀❀❀ يا إبراهيم

جملة تكررها المرأة عندما تفتقد الرومانسية

(هي مش مجنونة ولا نسيت اسمك

هي شافت الفيلم بتاع هند صبري ...

لازم تجيب ورد حتى لو اسمك مش إبراهيم).



ربطة النينجا

هي ربطة للرأس تجيد الزوجة لفها بمهارة على رأسها
مع عقدها من الأمام على شكل فيونكة ونلاحظ كبسها
على الجبين فتظهر العينان بشكل ضيق
لكنه يسمح بالرؤية
(ننصح بتكرار كلمة سلامتك يا حبيبتي كل دقيقتين
مع التأكيد على تناول حبايتين بانادول ومج نسكافية
وشوكولاتة جالاكسي
والصبر لحد ما الصداع يروح).





٢

أفكار رومانسية

ركزي معاية

عيشي مع زوجك لحظة حلوة ..

بس ما تقفیش علی سور البلكونة وتقوليله تعالى نعمل

زي تاييتانيك

هيزفك ويقول انتحرت

مافيش تاييتانيك وأصلاً الفيلم متصور في طشت.

(بس ممكن تتفرجي معاه على صور خطوبتكم).

ابعتيله جوابات

بس ما تكتبش على ورق (بحبك) وتطبقهم مربعات
وتحطيهاله في الرز .. قال إيه علشان وهو بياكل يلاقيها
يروح مطلعها ويقرأها ويفرح
هيطلعها وتقف في زوره وأنت حرة
(اكتبيها في جواب وحطها جنب الطبق)



أخرجني معاه

بس بلاش تقوليله لما تروحوا مطعم اسحب لي الكرسي
وقعدني الأول لأنه منتظر الفرصة دي من زمان وهيقعك.
(أقعدني قدامه علشان مايشوفش غيرك
ونفسه تتسد .. أأأ. قصدي علشان يشوف نفسه
في عيونك وابتسمي).



لما يدخل من الباب حسسيه إنك فرحانة

بس بلاش تعيشي دور صفاء أبو السعود وتلبسي الجيبة

أم كرانيش وتتنططي لما يرجع من الشغل هيتصدم

ويقل الباب تاني وهيتغدى لوحده في كنتاكي.

(البسي فستان وحطي بارفان وسرحي شعرك).



حسسيه إنه غالي عليك

بس بلاش تعيشي حالة ميرفت أمين وتقوليله وأنت بتعيطي

أنا بحبك ومش عارفه لو جرى لك حاجة هأعمل إيه

من غيرك أنا والعيال .. يا نكدية

(قوليله: أنت نور عيوني).



حطي فازه فيها ورد

بس بلاش تقطعي الورد وتعمليله طريق من باب الشقة
لحد الطبلية ... أأأ... قصدي السفارة إبنك اللي بيزحف
هيفتكره حاجه تتاكل وهياكله وهيجهله إسهال
وأنت اللي هتسهرى بيه ... بلاش الورد
(خدي بإيده وامشي معاه لحد السفارة).



الإضاءة

بس بلاش العشاء على أضواء الشموع مهما عملتي مش هتداري
غلطتك هيعرف إن الفرخة لزقت في الطاسة وأنت بتحمرها
واتهرت .. أكله في النور.
(الأباجورة .. إضاءة رومانسية).



اعمليله مفاجأة

بس بلاش تفاجئيه وتروحيه الشغل ..

لو دكتور .. هيقول دي مريضه عندي

لو محامي .. هيقول زبونه ولها قضية

لو مدرس .. هيقول والدته تلميذ فاشل عندي

على ابنك

لو مهندس .. هيقول لقيتها في الموقع تحت العمارة اللي اتهدت

لو ضابط .. هيقول دي مجرمة أنا قبضت عليها وهيوديكي السجن

(خليكي في البيت أحسن).



بلاش تَسْخَبِي ورا الستارة
علسان يَقلَق ويدور عليك ..

أولاً: هَيْتَسِرِع

ثانياً: مش هيدور عليك أصلاً وهتفضلي ورا الستارة .. بلاش



إديله أكبر حة في الفرخة

أكلية قبل ما تاكلي

غطيه لما ينام وطبطبي عليه

خليكي حونية

ووطي صوتك

وبلاش الشبشب أبو كعب في البيت.



السبغة في

ذات صباح في بيت هاديء دار الحوار التالي:

- حبيبتي صباح الخير

- أستغفر الله العظيم أنت ما تعرفش إن صباح الخير بدعة ..

الشيخ عبد الهادي اتكلم عنها

في كتاب الكلام الأخير في حكم صباح الخير

-طب خلاص السلام عليكم.

- قولها كاملة علشان الثواب وعليكم السلام ورحمة الله وبركاته

زي نصيحة الشيخ عبد السلام

في كتاب آراء الإمام في كيفية إلقاء السلام.

- ودول بتسمعيهم في الراديو يا فتحية.

- قول لي يا فيفي

- هي فيفي دي مش بدعة؟

- طب ما تقولهاش قدام إخواتك

دول الشيوخ اللي بيعجوا في التليفزيون.

- صحيح، كويتي لي القميص والبنطلون.

- معلى نسيت أصلي كنت بصلي قيام ليل وسهرت لحد الفجر.

- ما شاء الله طيب النهارده الخميس مش هنروح لأمي ده أنت ما

شفتيهاش من شهر.

- لأ روح أنت وخذ الولاد أنا رايحة درس الشيخ همام

في كيفية صلة الأرحام

- خلاص لما ترجعي اعلمي لنا بسبوسة بالأناناس والكريم شأنتيه

لحسن أكلتها عند واحد صاحبي ونفسي فيها.

- استغفر الله أنت ما تعرفش إن الكريم شأنتيه فيه شبهة

في مكوناته إنها تحتوي على ودان الخنزير.

- أعوذ بالله .. بلاش .. طب وبالنسبه للبسبوسة.
- من إسمها أهه (باس .. بوسة) أنت ترضى إني أعملها.
- لأ طبعا .. أقنعتيني الصراحة ... طيب هنفطر واللا بدعة O_o.
- هنفطر طبعا تحب تفطر إيه.
- والله أنا جعان جوع السنين اعلمي أي حاجه مش بدعة ولا حرام وأنا هاكلها.
- طب هأصلي الضحى الأول وارجع لك.
- ما تتأخرين.



بعر ساعه ..

تيكيلام تيررين تيكيلام

(صوت المعلقة وهو بيقلب الشاي وهي داخلة بطرحة الصلاة).

- إيه يا حبيبي أنت عملت شاي.

- وفطرت كمان يا ست فيفي.

- أنا يا دوب قرئت الورد بتاعي.


- وكنت جاية خلاص أعمل لك الفطار.

- ولا يهملك .. بأقول لك إيه.

- نعم يا حبيبي.

- هو الشيخ همام قال إيه عن تعدد الزوجات؟

- هتروح لمامتك الساعة كام يا حنفي.



حمائل

ما تزعليش

من حماتك لو بصت لك كثير
وبحلقنت يوم ما جت تخطبك
إبنها اللي قالها بصي يا ماما معايا لأنه بيتكسف
مش قصدها تبص كدة.



ما تَزَعْلَسْ

لو حماتك قابلت (جوز أخت مراتك) بترحاب أكثر

ممکن يكون دخل العيلة قبلك بست سنين

وواخدين عليه أكثر ويمكن أكبر سنًا

يمكن أنت أحسن فبیراضوه نفسيًا

ويمكن علشان حاجات بتفوت عليك ..

خد بالك



ما تزعليس

لو حماتك ما أكلتش الكيك اللي مامتك قدمته

الكيك حلو بس هي مكسوفة

طيبة على فكرة .. سيبك من اللي حصل في المسلسل



ما تزعلس

لو مرة حماتك قالت كلمة زعلتك

فوتها .. ما هي اللي علمت مراتك الفاتحة والصلاة

وابنك الكبير حفظها من أمه يعني كل سجدة من ابنك

في ميزان حسنات حماتك

وبيدعي لك فيها .. شفت بقى :).



ما تزعليش

لو حماتك حكت لك عن مشكلة بنتها مع خطيبها
مش قصدها تعمل إسقاط سياسي على خطوبتكم
على فكرة هي بتفضفض
وحتى لو كأنت قاصدة طنشي.



ما تزعلس

لما حماتك زعلت منك وتقول لك أنت مش مدلع بنتي ...

أصلها ما شافتش الفرحة في عنيتها كويس ..

شافتكم وأنتم تعبانين بس

بينوها شوية وراضي زوجتك وطبطب عليها وسط أهلها

علشان يوم ما هي تشتكي يقفوا معاك ويعقلوها.



ما ترعليس

إن حماتك بتتكلم على ابنها كثير وبتشكر فيه ...

أصلها شالته على قلبها تسع شهور وبتحبه قوي

زي مامتك ما بتموت في أخوك

وزي ما بتحبي إبنك كدة ..

يعني حته منها.



ما تزعليس

لو قالت لك الفراخ اتهرت والبامية مش حلوة ... إيه يعني ..
قوليلها هو أنا هعرف أطبخ زيك يا ست الكل علميني ...
واعملي نفسك مهتمة واكتبي أي حاجه واتصلي بيها مرة
واللا اتنين واسألي على أكلة حتى لو ما عملتيهاش
وشوفي هتحبك إزاي.



ما تزعلس

من حماتك لما بتلومك ..

أصلها متعشمه فيك خير ومنتظره كلمة حاضر ...

يمكن كلامها غلط

ويمكن رأيها مش صح

بس أنت تقدر تطيب خاطرها

بكلمتين وبالعقل وتعمل اللي أنت شايفه صح.



ما تزعليش

لو ما حبتكيش زي بنتها ..

أصل بصراحة كمان مش بتحبها زي مامتك ...

آه والله خلي كل حاجة في مكانها

أمك ما حدش هيحبك حبها ومش هتتعوض.



ما تزعلس

لو ما حبتكش زي إبنها اللي من لحمها ودمها ..

على فكرة دي بني آدمه وكبرت وعجزت وتعبت وضحت

مش العدو اللدود

لازم تحترم وتحترمي مشاعرها

(خدوا بالكم قوي من اختلاف الفكر والتعليم والثقافة والبساطة

وعاملها على قد إدراكها وسنها).

ما تخليهاش تحس إنها خلاص راحت عليها وهتشيلها في الصندرة

هتخطها في كرتونة على الرف

وتبص عليها كل أسبوع مرة

وفي العيد تطلعها وتلمعها

ويوم الأم تجيب لها شنطة وتحطها المسكينة

جنب الشنطة والشنطة

سهلوا واتفقوا مع بعض

هات خطيبتك أو مراتك واتفقوا اتفاق

هأقول لمامتك يا

(ماما)

وهتقولي لأمي يا

(ماما)

هنرهم سوا ونسهل على بعض

وفي حضور أُمي هاراضيها على حسابك معلى ساعديني بكلمتين ..

أشكري معايه فيها وفي تربيتها ونضافتها وأكلها

وخليها تحس إنها ملكة ..

وبلاش نشتكي من بعض .. خلينا نشتكي لبعض منا

وفي بيتنا لما نرجع يا زوجتي أنت الملكة

ويا ريت قبلها يكون في البيت

هو الملك.



سامح

سامح شاب طيب وببيدور على عروسة ...

- سامح سامح.

- أيوه يا ماما.

- طنط تهاني الخاطبة جت تعالى قول لها على مواصفات العروسة

اللي نفسك فيها.

- إزيك يا طنط.

- بسم الله ما شاء الله إزيك يا سامح والله كبرت وعاوز عروسة.

- يا رب بقى ألاقى عروستي عندك ... لحسن أنا دخت وتعبت من

كتر العرايس اللي شفتهم.

- يا رب ... ها قول يا حبيبي علشان أكتب ..

استنى لما أطلع القلم والنوته.

- عاوز واحدة متفجرة الأنوثة.

- ليه بس يا بني ربنا يكفيننا شر الانفجارات.

- وعاوزها قنبلة كدة لما تظهر في أي مكان.

- هو أنت بقيت إخوان يا بني واللا إيه ... ماشي هاكتب

أهه .. أون .. ب ... له.

- وعاوزها شعرها حرير وبيهفف كدة على خدودها زي الشرارة

اللي بتطلع لما الواد سيكو الميكانيكي بيشغل مكنة اللحام.

- سهلة دي الكرياتين حلها يا سامح .. اللي بعده.

- تكون عينيها خضرة وواسعه ومدورة.

- هتحدك يا بني بلاش مدورة دي ..

هاكتب عينيها حلوة وخلاص.

- طيب .. بس اكتبني كمان إنها تكون مش قصيرة

علشان تعرف تنضف النجف وفوق الدولا ب وكدة.

- حاضر ... طويي ... يل ... ة .. زي راس .. ال .. عبد.

- وبقتها صغير وبتعرف تحط روج.

- ما كلهم بيعرفوا هياكلوه يعني ... بقها ص .. غ .. ي .. ر.

- ومناخيرها رفيعة وتكون شايلة اللوز واللحمية ...

- ؟؟؟ ... لازم تتنازل شوية يا بني الطلب ده كثير.

- خلاص مش مهم .. أمري لله.

- وإيه كمان.

- وعاوزها رقيقة وبتعرف تتكلم كدة ومدرحة

وفاهمة كل حاجه مش قفل.

- وماله ... مد .. ر .. دحة.

- بس محترمة وبريئة وما بتطلعش منها العيبة وخام.

- مدرحة وخام يا سامح!

- آه.

- وفاهمه كل حاجه وبريئة يا بني!

- أيوه.

- ومتفجرة الأنوثة وبتفرقع يا حبيبي!

- أيوه يا طنط هو أنا هأتجوز كام مرة يعني.

- كمل يا سامح.

- عاوز أحس إني هأتجوز ملكة جمال يعني ما أحتاجش أبص

لأي بنت بعدها .. عاوزها قمر قمر قمر ... مالك يا طنط بتبصي

لوداني ومناخيري ليه؟

- أبدًا يا حبيبي بتأمل فيك وفي جمالك ووسامتك ... خلصت؟

- كفاية كدة أنا فنوع وهي دي بس طلباتي.

- طيب تعليمها، ثقافتها، دماغها، إخوانها، مش عاوز حاجة متفجرة

كدة والا حاجة.

- لا مش مهم ... شكلها أهم حاجة :).

- طيب إمكانياتك إيه؟ -_-

- يا ماما انا ...

- مستعد تدفع كام مهر وشبكة والشقة كام أوده؟

- يا ماما ١١١١١١١١ ... تعالي طنط عندها أسئلة.

- أيوه يا تهاني؟

- فين يا حبيبتي شقة ابنك اللي المحروسة متفجرة الأنوثة

هتعمرها وتنفجر فيها وإمكانياتكم في حدود كام.

- هو سامح ما قالكيش.

- لأ الصراحة ... هو ما قاليش!

- عاوزين عروسة بنت ناس طيبين كدة

وبيشثروا راجل.



وجع

كأنت قاعده جنب جوزها في البلكونة وشايله بنتها القمر

اللي شبهها، سرحت شوية واكتشفت إنه بيبيص لواحدة!

- عجبك؟

- مممم .. بصراحة؟

- أيوه بصراحة.

- جميلة قوي.

- نفسك فيها؟

- بصراحة .. قوي.

- إيه اللي عجبك فيها أصلاً!

- عامله كدة زي القشطة.

- طيب وإيه اللي مأخرك؟

- مش جاهز ماديا ... الموضوع موضوع فلوس بس.

- يا سلام! ومالك متأثر كدة.

- خايف واحد غيري يخطفها مني.

بنتها عيطت ... قامت وطبطبت عليها ونيمتها وغطتها

ورجعت له ... ووقفت وحطت إيديها في وسطها وقالت:

- لو معاك فلوس ...

- من غير ما تكلمي مش هاستنى لحظة كفايه اللي أنا فيه ...

واللي شفته من يوم ما اتجوزنا

دمعت شوية وبلعت ريقها وتماسكت وبصت له بثبات، وقالت:

- ارضى باللي معاك واشكر ربنا.

- هو أنا اشتكيت ما أنا صابر أهه!!

- ربنا يرزقك الأحسن -_-.

- أصلا ما فيش أحلى منها.

- ليه يعني!

- ولا أحلى ولا أنصف ولا أروع ولا ...

- كفاية .. كفاية.

ودخلت وغابت شوية ورجعت بشبكته وحطتها بين إيديه!!

- خد بيع شبكتي وخذ الفلوس.

- للدرجة دي!

- أيوه أنا بحبك أكثر من أي حاجة في الدنيا مش مهم الذهب

ولا الفلوس ولا أنا المهم تكون مبسوط وتحقق اللي نفسك فيه.

- تسلمي يا حبيبتي .. بس بأقول استنى شوية يمكن ألاقي عربية

تانية موديلها أشيك من دي واللا إيه.

- وماله يا حبيبي.

- طب شيلي الشبكة وهاتي شاي.

- حاضر.

عش الحب

جاء الصباح وشقشقت العصافير
وغردت البلابل واهتزت الأشجار وطارت الفراشات
وعشش الحب في بيت سعيد
- صباح الخير.

★ صباح الفل يا أجمل زوج في الدنيا.

- بأقول لك إيه يا حبيبتي قومي اعملي الشاي وسندوتش جبنة
بطماطم على بال ما ألبس علشان إتأخرت على الشغل.

★ مش قادرة يا جميل أصلي كان عندي أرق

وتعبت بالليل يا حبيبي.

- هو كل يوم أرق! ... ألف سلامه .. -

★ روح أنت يا عسول حط البراد الأمور على النار واعمل الشاي؟.

- حاضر.

بعد شوية ..

- أنا نازل.

★ إيه الشياكة دي ... أنور وجدي يا خواتي .. مع السلامة.

وبعد الظهر ...

- السلام عليكم.

★ وعليكم السلام يا أجمل زوج في الدنيا كلها.

- فين الأكل؟ أنا ميت من الجوع.

★ طب قبل ما تغير هدومك يا سكر

انزل هات لنا

كيلو طماطم حمرة زي خدودك

وكيلو بطاطس مقطقة زي مناخيرك

وكيلو بصل عسول زي ودانك

وكيلو بدنجان إسود زي عيونك

وعلبة سمنة ننه كدة وصغنه.

- وماقلتيش ليه الصبح وأنا نازل

أنت من يوم ما مامتك بطلت تبعت أكل ماطبختيش.

★ مارضيتش أقلقك يا جميل وقلت لما ترجع.

- طب مافيش أي حاجة تتأكل في البيت.

★ في تونه صغنونه روح برجليك الأمور هتلاقها في المطبخ العسول

ويا ريت تغسل المواعين علشان أنا حطيت لك لون المونوكير

اللي بتحبه.

- طب تعالي كلي معاه.

★ كل أنت بالهنا والشفأ يا جميل ..

أنا أكلت ساندويتش لانشون عسوووول

بالليل

- هو فين القميص الأخضر؟

★ في الغسيل يا حياتي.

- والبنطلون الكاكي؟

★ حرقته وأنا باكويه يا روجي.

- وشراباتي كلها فين؟

★ منورين في الحمام يا نور عيني.

- طب وبتغسلي إمتي.

★ ساعدني وحطهم في الغسالة الجميلة المربعة يا عسل

وشغلها على بال ما أعمل لك الشاي يا قمر.

تاني يوم ...

تك تك تك ...

★ ميين.

- أنا أمك العسولة يا ننوسة

جاية ومعايه أبوك القمر يا ستوته

علشان ناخدك على بيتنا المحندق على دماغك يا توته

لأن جوزك المحروس طلقك يا أمورة

حضري شنطتك المقطقة يا نور عيني.



حقك عليه

حقك عليه

كلمتين ما يطلعوش إلا من قلب بيحب بجد؟
 قلب نضيف، بيبقى جاي يصلح لأنه مصالح نفسه
 ساعات تتخانق مع (نصك) الثاني

زوجك ... زوجتك

قصدي (كلك) الثاني ما هي خلاص بعد الجواز والحب مابتبقاش
 نصين بتبقى حته واحده علشان كدة بتتوقع قوي
 لما بتزعل منه.

بتزعل وتبعد وتسكت وتفكر وتفكر

وتحس إنك بتتحرق

ولو حد حاول يهديك مش هتسمعه ولا هتشوف كلامه

لأنك بتبقى عاوز تحكي بس اللي بيوجعك ..

عاوز حد يسمعك.

وعلى فكرة

مش هترتاح مهما اتكلمت ومهما بكيت؛ لأنك مش هترتاح إلا إما

تتكلم مع اللي أنت أصلا زعلان منه.

الشیطان مش هيسيبك وهيفكر بك كل غلطة وكل هفوة

وممكن حاجات أنت وقتها اتصرفت بحكمة وعديتها وأخذت ثواب

بس إبليس اتغاض وعاوز يحبط لك ثوابك ومش هيسيبك.

وهتلاقيك بتقول لنفسك وللناس

(أنا) عملت مرة

و(أنا) سامحت مرتين

و(أنا) ما رديتش في اليوم الفلاني

ومش كفاية إن (أنا) استحملت كذا وكذا

طب وبعدين!

ولحد إمتى؟

فاكر لما شفتها أول مرة

لما رحت تخطبها ..

ركز .. وافتكّر

مش قصدي أول نظرة .. لأ أول دقة قلب في صدرك حسيت بيها

لا وأنت بتتكلم معاها وعرفت إن هي دي

خطفه كدة في روحك

بتبقى عاوز تحط إيدك على قلبك علشان تمسكها قبل ما تهرب

من فرحتك ...

بتزعّلها ليه بقى ... دي حبيبتك

طب مش بتسامحها ليه

فاكره لما كنتي بتحسي إنك طائيرة في السما وسط السحاب وعاوزة
تحضني كل الناس وتتنططي من الفرحة علشان هو اتصل بيك
وقال لك بحبك ...

مش ده جوزك حبيبك ..

بتزعليه ليه

طب مش بتعديها له المره دي ليه

ما تقولوش كرامه الحب بين الزوجين مافيهوش كرامه

في صحيح مسافات وزوايا بتتظبط من قبل الجواز

لما بتروح تخبط على باب بيتها وتختارها صح

بنت الطيبين ومتربية وعارفه يعني إيه

(أصول)

ولما بتوافقي عليه لأنه على خلق ودين

(مش منظر وبس)

ساعتها بيبقى في رصيد قديم

ومواقف تتشال على الرأس

وكلام مايتنسيش

كلام حلو

وحاجات حلوة كمان كثير.

افتكر كام مرة فرحت مع (كلك) الثاني.

افتكر السكينة اللي أنت مفتقدها دلوقت وأنت زعلان معاه.

مش هترتاح على فكرة إلا لما تتصالح معاه ... كلنا كدة

في مساحة ود ورحمة لازم تفضل في كل بيت وكل قلب

عندها بتنسى كرامتك وتقلع التاج اللي على راسك وتمشي حافي

ما حدش أحسن من حد

أنت وزوجتك

وأنت وزوجك

مش عيب ولا حرام إنك تقول أنا آسف

(حقك عليه)

اتشجع وقولها وأنت ثابت وخذ نية

خدها لله

قول لحبيبيك ... حقك عليه؟

ويا بخت اللي يسبق ويأخذ الثواب والأجر.

اللهم أنزل السكينة على بيوتنا جميعا وبيوت المسلمين

واسعد كل زوجين.



المربحية بالفندقوش

أنا: أنا اشتريت المربحية بالفندقوش.

أنتم: إيه المربحية بالفندقوش دي يا أم البنين.

أنا: حاجة كدة جمبيييلة

قوي جدا خالص خالص

شكلها ملفلح

وطعمها زي السراريش

وريححتها تحفه زي المهابيخ

وعليها من فوق دحاليج

وحلوة مع الشاي بلبين.

أنتم: الله!

أكيد حلوة ... شكلك فرحان

يا ترى بالشوكولاتة دي والللا الكريمة أنت أكلتي كام حطة

يا أم البنين ... طب عاوزين نأكل

ونندوق وكدة.

أنا: في ناس كثير أكلتها

ربنا يرزقكم بقى ويحنن عليكم

يا عيني يا مساكين.

أنتم: يا ترى شكلها إيه

وايه السراريش دي

ومين الدحاليج دول.

وروحوا وناموا واحلموا وافتحوا التلفزيون

واتفرجوا على الإعلانات والأغاني والأفلام واسمعوا كام بيت شعر في

وصفها وقصة قصيرة ورواية عن شعورك وأنت بتأكلها.

في جزء منكم هيتخيلها حلويات، والثاني حوادق، والثالث هيشوفها
فطيرة والرابع برايم برايم.

وارفع سقف التوقعات لفوووق لحد ما رجلك تطير في هوا

واحلم أحلام وردية وخيالية

واحلم معاية ببكرة جاي ولو ما جاش إحنا نجيبه بنفسنا

قوم إيه بقى لما تيجي تأكلها -ورغم إنها حلوة جدًّا وبما لا يخالف

شرع الله- تقول إيه ده

أنا كنت فاكرها أحلى من كدة

ويجيبك إحباط

وممكن تدعي على أم البنين

أهو ده اللي بيحصل مع

(الحب والجواز)

إتهرينا في الأفلام والمسلسلات وأغاني أم كلثوم وعبد الحليم كلام

في الحب وسيرة الحب وسنين الحب وعذاب الحب

وكل بنت قاعدة مستنيه العريس الوسيم الشاطر

(حسنين)

ييجي بسلامته راكب حصان أبيض

ويخطفها من أبوها وتعيش في قصر كبير وتلبس فستان واسع
وتغيظ الملكة.

أو يكتب فيها شعر ويتشعبط على المواسير

ويطلع لها من البلكونة ويقع فتتكسر رقبتة ويتجوزوا في
المستشفى.

والشاب من دول فاكر إنه هيتجوز سندريلا

وهيرجع الظهر يلاقي الأقزام السبعة خلصوا شغل البيت (وغسلوا

المواعين) وهي الأميرة النائمة وهيصحيا بقبلة رقيقة

وهتقوم من النوم متسشورة وحاطة روج ولابسة جزمة.

وسقف التوقعات بيرتفع لفوق أكثر لما بتتكتب قصص الحب

وكلام الحب مع صورة اتنين شكلهم حلو

وهي لابسه ومتأنتكة وهو حاطط جل في شعره و شايها

أو ماسك مناخيرها مسكة سينيمائية وهي حاضناه وماسكة

ودانه.

وبيبص لها بحنان وبتبص له بدلال

(مع الاعتذار لدلال)

وروحوا وناموا واحلموا وافتحوا التلفزيون واتفرجوا على الإعلانات

والأغاني والأفلام واسمعوا كام بيت شعر في وصف الحب وقصة

قصيرة ورواية عن شعورك وأنت بتحب.

وتعالى اتجوز

وتعالى إتجوزي

الإنسان اللي إختريته وفرحانه بيه وطبعا اللي لسه عايش في الأحلام

ومتوقع شيء خيالي وساب نفسه للمؤثرات المرئية وكلام الناس

والرغي والفتي الكثير ونسي الواقع هيكون شعوره كدة زي اللي

أكل المربحية بالفندقوش ولقاها مش حلوة وزى ما كان فاكـر

...

رغم إنها حلوة وزى العسل.

افهموها صح

الحب بين الزوجين ليس لها قالب واحد ولا نموذج متفرد كل
زوجين لهما حالة خاصة من الاندماج والتفاهم والحب تختلف عن
الآخرين

والسعادة مذاقها مختلف من شخصية لأخرى فلا تطبق تجارب
الآخرين على نفسك.

الحب مش محتاج أميرة وأمير وملكة جمال وفارس الفرسان.
الحب يعني تحبها بعد الجواز حتى وهي حامل ووشها مورم
وخدودها منفخة.

يعني لو بقى أصلع وبكرش يفضل فارس أحلامك.
يعني مش محتاج يكتب شعر كفاية كفه اللي بتطبطب على
ظهرك ما هي دي ترجمة كلمة بحبك.

يعني هي جميلة لأنك بتحبها حتى لو هي مش جميلة.
يعني كل لحظة تمر عليكم مع بعض بتعيشوا جوا بعض.
يعني أنت مسجون في روحها حبس إنفرادي.

يعني أي بنت حلوة مش هتلفت نظرك؛ لأن قلبك شبعان بحبك

لزوجتك.

بأقول لكم إيه

هي إيه المربحية بالفندقوش دي يا بنات حدش يجيب لي مقاديرها



حول رسم جدار

(أفكار ملظظة)

دَقَّت الساعة معلنة بحذر أنها الثالثة عصرًا،

حلَّق أفراد أسرة الأستاذ (حنفي) مدير عام مصنع الأناقة للغزل

والنسيج حول مائدة عامرة بما لذَّ وطاب

اقتربت زوجته المصون وهي تسير بخطواتها البطيئة وبين يديها

طبق كبير تكس عليه ما لذَّ وطاب

من المحمر والمشمر

مالت الأم وشغلت حيزًا كبيرًا من الفراغ، فمال أبنائها يمينًا ويسارًا

علشان يوسعوا لها السكة، ووضعتة في وسط المائدة وجلست مُحدثة
رَجَّة هائلة فاهتز المرق واندلق بحياءٍ من السلاطين المتأرجحة
ودار حوار دسم جدًّا:

- بسم الله الرحمن الرحيم ... بسم الله يا أبو محمد

-الله! ريحة برام الرز هائلة يا ماما:

-بالهنا والشفأ يا حبيبتي...ما تتقليش علشان العريس اللي جاي
بالليل

أجابت (نوسة) وهي غاضبة بعد أن أمطرت المائدة بحبات الأرز وهي
تمضغ قطعة

اللحم التي ألقت القبض عليها مدسوسة في البرام المعمر

-ليه هو أنا داخله امتحان .. اللي مش عاجبه ما يببشش (ورفعت

حاجبها الأيسر) أنا كدة زي القمر ^ - ^

أشار الأستاذ حنفي إلى ابنته بربع الرغيف المتبقي في يده

بعد أن قضى على بقيته وهو ينقنق غارقًا في الباذنجان المخلل الذي

تمددت أصابعه في خنوع في الطبق

مستسلمة لنظرات حنفي المفترسة وقال:

-بيقولوا عنده شقة يا نوسة، بس مش هايقدر يدفع مهر كبير
يا دوب الشبكة، بس والله شاب محترم ويعرف ربنا، وكمان شافك
يا نوسة أكثر من مره ومعجب بأخلاقك وحجابك

رفعت أم محمد رأسها فجأة ونظرت إلى الجميع نظرة خاطفة وشفطت
الشورية شفطة لولبية محدثة صوتًا بديعًا رنانًا وقالت:

-كان نفسي يندفع لها مهر زي نوال بنت أختشي، آمال إيه هو أنا
بنتي شوية

ابتسمت نوسة بعد معركة جانبية مع ورك الفرخة المأسوف على
شبابها وقالت وهي ترفع يدها ممسكة ببقايا الدبوس قائلة:

-أنا نفسي في فرح كل الناس تتكلم عليه وعاوزاه في فندق كبير
وعاوزه العريس شعره ناعم ويفرقه من النص ويوم الخطوبة يلبس
كرفته برتقاني لون فستاني اللي هايكون بديل.

ابتسم شقيقها محمد ابتسامة جانبية وقال بصوت خافت:

-دليل!!... هو أنت ناقصة

قامت نوسة بتوجيه ضربة حرّة مباشرة لصدر محمد، واهتزت

المائدة، وتبادلت أصابع الكفّة نظرات الاستغاثة مع ورك

الفرخة واستمر الحوار

لوح حمدي بالخيار التي استشهد نصفها على شفّتيه وقال:

-أنا باقول ما فيش لازمة للأوتيل والفرح والكلام الفارغ

وكفاية يكمل شقته وأهو تلبسي فستان أختك فيفي.. طالما الولد

صالح وتقي ويعرف ربنا

ابتلعت نوسة ما في فمها ورفعت حاجبيها (اليمين والشمال) وقالت:

-إشمعني أنا يا باباوبعدين أنا لازم أخس النص علشان

ألبس فستان فيفي أصلاً

انتهاز محمد الفرصة وقال:

- بس أنت خسي وأنا أركبك ديل قصدي للفستان

التفتت إليه موجهة ضربة ركنية في خده الشمال فانهارت حلة

المحشي متعاطفة مع آلامه، وتبادل حنفي مع زوجته

النظرات، وهنا قررت الأم أن تتناول أطراف الرغيف قصدي الحديث

وأرادت أن تشرح لها عملياً

فقامت بإدارة الديك الرومي ليكون أمامها مباشرة وغرست

السكين فيه وقالت وهي تعض بأسنانها العلوية على شفتها السفلية:

- لازم نصبر عليه لحد ما يستوي، ونوطي النار، وبعدين ما

نكترش فيه الملح لأحسن يتهري

- ويطفش أضاف الأب وهو يتناول طرف الرغيف الآخر ... أأ ..

قصدي الحديث

وأكملت زوجته:

وبعد ما يستوي ويبقى في إيدينا ويسيب لنا نفسه

كدة، نمسكه كدة بالشوكة، ونقطّع فيه زي ما احنا عاوزين،

وممكن كمان نحمره أو نشويه

سألتها نوسة بخوف بعد أن أحست بتأنيب الضمير

- هو مين يا ماما؟

أجابتها ببساطة وهي تلوح بالسكين:

- الديك طبعاً يا نوسة ...

ارتبكت نوسة وتأملت قطعة الديك الرومي الغلبان التي رفعتها أمها

على طرف

السكين وألقته في طبقها المستدير .. ونظرت إليها بحول شديد ...

وتذكرت كيف يعود أبوها من عمله وعلامات الإجهاد على وجهه

والتفتت إلى أخيها محمد وتذكرت كيف ينام على الأريكة وهو

يشاهد التلفاز لمدة ربع ساعة ليتستيقظ على صوت الملعقة

وهي تصطدم بكوب الشاي ليتجرعها وهي ساخنة بسرعة ليسرع

إلى عمله الآخر الذي لجأ إليه ليحاول إكمال ثمن مقدم

شقة ليخطب فتاة أحلامه فأزاحت الطبق وقامت وهي تمسح آثار

الجريمة من على فمها وقالت:

- ماما ... أنا خلاص حابتي ريجيم من بكرة

بابا ... أنا موافقة على كل حاجة وكمان حالبس فستان فيفي ...

بس يا رب أعرف أخس

محمد يا أخويا، ألبس إيه النهاردة

رفع محمد رأسه ونظر إليها بحنان وقال:

أي حاجة من غير ديل ...

وعلى فكرة أنت مش طخينة قوي

أنت زي العسل.



عريس الكسروني

في بيت دافئ وبينما تقف الأم بين الأبخرة المتصاعدة من الأواني
المختلفة لتتعانق في حنان وحب وتحلق فوق هذا البيت الهادئ دخلت
أميرة على أمها وهي تصيح
- أماه لقد جاءني عريسًا
- الحمد لله يا ابنتي لقد هرمننا في انتظار العريس المطلوب
- نعم أخيرًا يا أمي كم أنا سعيدة
- والله لقد طلع من عيني الاثنتين العريس الذي رفضتيه الأسبوع
الماضي.
- لا تحزني يا أماه، فهذا أفضل منه
ويقول أنه معجب بشخصيتي المنظمة وتفكيري المرتب؟

- تنيلي على عينيك يا ابنتي الحبيبة واذهي أولاً ورتبي غرفتك
ومشطتي شعر رأسك

- حاضر يا أمي كفاك صياحاً يا غالية أين المحروس بسلامته أخي؟

- وأين سيكون مثلاً! على الأريكة في غرفته يشاهد التلفاز.

- سأذهب لأشاهد معه برنامج (العرب لهم مواهب) فأنا أشجع

المشترك الذي يغني

(بالإنجليزية)

- يا خيبتك الثقيلة أي موهبة عربية تلك وهو لا يغني بلغته الأم!

- لأنه يتيم... أأ أقصد...صوته الرائع هو المهم.

- جاءتهم ستون خيبة أين الهوية العربية في المواهب!

- موجودة يا أمي فالحفلة في بلد عربي...العالم تغير يا أماه نحن في

عصر الإنترنت.

- ليته ما تغير .. حتى اسم البرنامج مكتوب بالإنجليزية واسم

القناة التي تعرض الحلقات بالحروف الإنجليزية والمواهب أمريكية

.. والتصويت بyes نعم يعني.

- سألني عن عمري ودراستي واسم أبي وعنوان عمله وعنك ... إلخ

إلخ.

- يا وقعتك السوداء...يا نهارك الذي لن يفوت ... وأخبرته كل

شيء.

- لا يا أمي طبعًا ولكن أرسلت صورتني فقط

- حسنًا حسنًا...ويا خبر بنقود غدًا سيكون مجانيًا، ومتى سيأتي

يا فلذة كبدي؟

- لا أعرف

- هل عنده شقة؟

- لا أعرف

- هل هو مستعد ماديًا؟

- لا أعرف

- كم عمره؟

- لا أعرف

- وماذا يعمل؟

منتهى الحب

- عاوز أتكلم معاك شوية ممكن؟

★ طبعًا حاليًا حانشر بس قمصانك علشان يلحقوا ينشفوا

- طيب بالمرّة اغسلي البنطلون الكحلي ولمعي لي الجزمة علشان نازل بالليل.

- حاضر من عيوني.

★ يالا جيت أهه حاكوي وأنت بتكلمني القميص اللبني اللي كنت

لابسة أول يوم في شهر العسل... فاكّر.

- خلصتي؟

- أنا جيت أهه خير؟

- لأقومي رضي الولد ونيميه علشان مش عاوز دوشة
- خلاص نام خير يا حبيبي .. عسول وهو نايم وشبهك خالص؛)

تررررر

- ممكن تفتح

- لأ، رجلي منملة ... افتحي الباب
- ثواني حاخد الحاجات من البواب وراجعة لك.
- وأنت رايحة هاتي لي الموبايل وطفى المروحة وناوليني القهوة.
- حاضر.
- حبيبي أنا خلصت ممكن توديني لماما النهاردة وأنت نازل.

- لأ

- ليه بس

- كفاية مرة كل أسبوعين

- طيب ممكن سحر تيجي تزورني

- لأ

- ليه

- لأنها حاتقعد تحكي لك على الكلية وتزعلي إنك ما كملتيش

وإحنا قلنا مش حاتكملي خلاص دراسة علشان البيت والولاد.

- طيب عاوزة مصروف ممكن

- حاتعملي بيه إيه أنت مش بتخرجي وأنا باحبيب كل حاجة.

- كان نفسي في مجلة كدة أجيبتها من المكتبة وآخذ توتو أمشيه

شوية في عربيته الصبح يعني.

- مالهاش لازمة...بلاش مصاريف

- طيب ممكن تخرج معايا.

- حانروح فين؟

- نزور أي حد أو نتمشى

- هي البلد فيها حاجة تتراح

- وديني الحتت اللي بتروحها كل يوم

- مش وقته...رايحة فين أنا عاوز أتكلم معاكي

- أنا جيت أهه؛ خير يا حبيبي؟

- حَاخِد رَأْيِكَ فِي حَاجَةٍ مَاشِي

- اَتَفْضَل ... بَسْ غَرِيبَةً أَوَّلَ مَرَّةٍ تَسْأَلُنِي رَأْيِي فِي حَاجَةٍ؟ يَا تَرَى إِيه؟

- حَاجَةٌ مِنْ حَقِّي وَمَشْ عَيْبٌ وَلَا حَرَامٌ

- خَيْرَ يَا حَبِيبِي

- أَنَا عَاوِزٌ أَتَجُوزُ زَوْجَةً ثَانِيَةً

- إِيه!



كيف تسع زوجتك

ابتسم وأنت تفتح باب البيت فشكلك أجمل وأنت مبتسم
 اعمل نفسك متفاجئ بالعيال وحاول تكون مبهج هي أصلاً كانت
 حاتعجنهم وأنت لحقتهم
 قل لها (وحشتيني) إيه الشياكة دي
 (ما تدققش لو لسه لابسه نفس الفستان بتاع أول إمبارح .. قول
 وخلاص وهي حاتفهم وتلبس واحد جديد)
 لو في يوم حرقت صينية البطاطس خليك ستر وغطى عليها وما
 تقولش لأختك ومامتك
 وافتكر لها طاجن البامية اللذيذ بتاع السنة اللي فاتت وسامحها ما
 كلنا حرقنا البطاطس ^-^

لو لقيت تراب على السفرة هات فوطة ولمع علشان تكسفها .. ق ..

قصدي

أو ارسم عليه قلب وسهم وحرف اسمك واسمها وسيب التراب

وهي بعد كدة حاتخذ بالها.

إديها مصروف أيوه ... مصروف تجيب بيه اللي نفسها فيه وخصوصًا

لو مش بتشتغل .. بيفرح قوي

(حتى لو جابت بيه جيلي كولا ما تناقشهاش)

اكتب لها جواب ولو مرة كل شهر

(حسن خطك) وحطه في المطبخ علشان تتأكد إنها حاتشوفه

أول ما تصحى من النوم

(أصلها بتقوم فوراً من السرير على المطبخ علشان تاكل ... قصدي

تطبخ

طببط عليها زي الأب ما بيطببط على بنته ... الست غلبانه

بتحتاج كدة

(بس مش وهي بتصرخ للعيال .. مش وقته .. طببط عليها بعد ما

تقدم لك صينية الكنافة وتخلص شغل البيت وتقعّد ترتاح ..

ساعتها بتبقى مهدودة فعلاً

أشكر فيها قدام مامتك وفي نضافتها

(ما تجيبش سيرة التراب اللي على السفرة)

وفي أخلاقها وطبيخها

(انسى صينية البطاطس)

وصبرها على العيال

(حاول تنسى صوت صريخها وهي بتغير لابنك)

وشياكتها

(بغض النظر عن العباية البرتقاني أم كسر)

ما تقارنهاش بحد علشان هي ما تقارنكش بحد

مش لازم تحكي عن زميلتك في الشغل الباشمهندسة فوزية

والدكتورة حسنية

وتشكر في شخصيتها وترغي وهي قاعدة في البيت منقطعة

وضحت وطالع عينها وفي الآخر تشكر في عنايات وهي قاعدة

عيب ما يصحش

الستات بتحب الأخبار (فراغ) سيبها تعيش دور المحقق كونان

وجاوب على أسئلتها

واحكي لها عن يومك حاجات يمكن بالنسبة لك بسيطة

بس هي لما بتعرفها وتلاقيك بتحكي بتحسها بالأمان

خرجها مرة كل أسبوع

بلاش وقت الحظر لحسن يعتقلوها

أشكر في أهلها

حتى لو مش بتحبهم دور فيهم على أي حاجة حلوة

هاتلها ورد

بلاش دباديب دول للمخطوبين بس

هاتلها شوكلاتة

حلوة الماندولين

إديها عيادية في العيد

افتكر أيام الخطوبة

لما تتعب وتسخن ارقئها وادعي لها واعمل لها ينسون واظهر شوية

تعاطف

(حاول تخبي فرحتك)

لو خارجين واشترتوا حاجه ما تشيلهاش كل الكياس كفاية
عليها كيس.

بالله عليك .. هي أسيرة عندك .. يعني كأنها عصفورة محبوسة في

قفص

وكانت فرحانة بيبك وعشمها فيك كبير

فما تخيبش ظننا وخطها في عينك واتق الله.



ألو... بعبر

أيام الخطوبة



(كُتِبَ الكتاب يعني)

هي لابسة بيجامة صفرا صفار رابعة مرسوم عليها تويتي وهو رافع

صوابع جناحه الأربعة وبتتفرج على صور الخطوبة

وهو قاعد في البلكونة ولبس التي شيرت البرتقاني وبيشرب شاي

والجو جميل

هو: تررررررررر

هي: آلوو

هو: إزيك يا حبيبتي؟

هي: إزيك يا حياتي؟

هو: أنا جاي النهاردة ... مش مصدق

هي: ولا أنا ... ما تنساش باحب أشوفك بالتتي شيرت الأورانج

اللي عليه زرافة

هو: يا ريت تلبسي الفستان الفحلقي اللي له ديل وجناحات وارفعي

شعرك لفوق علشان قفاكي يبان

هي: بس كدة حاضر من عيووني

هو: خلاص أنا رايح ألبس وجاي حالاً أهه.

هي: وأنا رايحة اعمل لك كيكة الجزر بالشوكولا..

هو: طب ياللا اقللي علشان مش قادر اقتل السكة في وشك خايف

اقتل على مناخيرك.

هي: لأ اقتل أنت الأول.

هو: لأ أنتي.

هي: لأ بليز أنت.

هو: خلاص أهه.

هي: الله.. أنت لسه ما قفلتش!!

هو: هع هع هع

هي: نياهاهاهاه



أنا: يا مرارتي

أنتم: يا مرارتنا



بعد الجواز

هو بالقميص طول النهار وعرقان عرق السنين

وقاعد في العربية مستنى الإشارة تفتح.

وهي واقفة في المطبخ بالبيجامة المقلمة الي جيبتها مقطوع

وماسكة المعلقة الخشب

وبتقلب الأكل

وشايله انھا العسل وهو يعبط ومناخره سايحة ويشد شعرها.

هو: تررررررررر

تردد

هي: (بعد ما حطت المعلقة الخشب في شعرها) أيوه مين --

هو: كل ده علشان تردى كنتى فين؟

هي: حاكون فين يعنى فى المطبخ

هو: أنا في الطريق اغرفي الأكل علشان يبرد شوية لحسن ما بعرفش

آكله وهو سخن

لأني ميت من الجوع وعاييز أنام قبل الماتش

وحطيلي البيجامة على الكرسي اللي قدام باب الشقة

والشيشب على باب الحمام ونوري النور.

هي: حاضر بس أصل

هو: بس أصل إيه!!

هي: لسه الرز بيتشرب على النار وصينية البطاطس فاضل لها تكة

وتتسبك ... والسلطة أهه خلااااص

يعني يا دوب ساعة إلا ربع كدة

هو: أmaal أنت كنتي بتعملي إيه طول النهار؟

هي: ابنك مغلبني ومطلع عيني .. آه ماتنساش تجيب البامبرز لحسن

هو لابس آخر واحدة

وريحته طلعت وأنا مش راضية أغير له وخايفة يجيله تسلخات.

هو: مش كنت تقولي من بدري

هي: ألو.. قفل السكة في وشي يا غلبي ياني. :)

هو: لا ما قفلتش أنا باحبكوا قوي

هي: ياااه ... أخيرًا ... فاكرا أيام خطو ... ب ... أاا ... ألو ... أنت قفلت
السكة:)

صح النوم ... الجواز مسئولية ^ - ^



شيفاك



أيون هي شايفاك

شايفاك وأنت بتكور الشراب وترميه تحت الكنبه.

شايفاك وأنت بتعمل نفسك مش واخذ بالك من قشر اللب

اللي وقع في الأرض.

شايفاك وأنت بتقول لها بحبك والأكل حا يقع من بقلك

(مش لازم تقول لها وأنتوا بتاكلوا):

شايفاك لما رجعت من الشغل وأنت بترمي القميص وتحذف الجزمة

(ها تخبط في وشها على فكرة كانت واقفة وراك)

شايفاك وأنت بتأكل الزبادي اللي بالفراولة

(هي قالت لك تأكله لبنتك مش أنت اللي تأكله):

شايفاك وأنت صاحي من النوم وشعر راسك مسافر وخدودك واردة

شايفاك وأنت بتتفرج على نشرة الأخبار

(وأنت مركز مع المذيعَة -_- استني لما جميل عازر أو فيصل

القاسم ييجي واتفرج)

شايفاك وأنت بتأكل بطيخ

(اعمل نفسك مش شايفها ولا يهملك دي مفترية وبتعمل أكثر من

كدة)

شايفاك وأنت بتجري على الموبايل قبل ما هي تمسكه علشان تفتح

رسايل صحابك

(بتعايبوا على الستات ليه في النكت)

شايفاك وأنت بتتفرج على صور خطوبة نيفين بنت خالتك

(كانت فاكَة الحجاب ارمي الصور بسرعة)

شايفاك وأنت بتبص لمناخير زميلتك

وأنت بتكلمها لما زرتوهم في البيت

(حاول دايماً تبص للنجفة لما تكلم ست قدام مراتك)

شايفاك وأنت بتتفرج على ماتش الأهلي والزمالك وبتبرق للعيال
وهي بتعدي من قدام التليفزيون وأنت بتتفرج

(أبو تريكة جاب جون)

شايفاك وأنت بتعد الفلوس من وراها

(هات اها هدية)

شايفاك وأنت بتدعي عليها... أأأ... قصدي بتدعي لها بعد صلاتك
شايفاك وأنت بتداري فرحتك... أأأ... قصدي دمعتك وهي عيانة
شايفاك وأنت بتشاور لمامتك علشان ما تاكلش من البيتزا اللي هي
عاملاها

شايفاك وأنت داخل بجزمتك في الشتا بعد ما مسحت الأرض

شايفاك وأنت بتهرب منها وهي بتغسل المواعين

(مش عاوز تساعدك ليه)

شايفاك وأنت عامل نفسك نايم علشان ما تشيل ابلكم اللي طول

الليل يعيط

شايفاك وأنت بتتاوب وعرفت انك شايل اللوز

(مش لازم توريها ضرر العقل المسوس على فكرة)

شايفاك وأنت بتضحك

شايفاك لما تحبها؟

خد بالك بتراقبك هي والعيال



سيفك

هو شايك وأنت بتبرقي لابنك علشان كب العصير على السرير.
وشايك وأنت بتكززي على سنانك لما ابنك كتب في الواجب
حرف السين معوج ونازل من على السطر
(ياشريعة).

وشايك وأنت بتخطفي الأكل من العيال
(قلنا هاتي لك كيس شيبسي معاهم وكل واحد ياخذ نصيبه)
وشايك وأنت بتكلمي مامتك في التليفون وعوجتي بقك وأنت
بتحكي لها على زيزي بنت عمك

(يا تحفة)

وشايفك وأنت بتضربي سندوتش الطعمية

(آخر واحد في الأربعة)

وشايفك وأنت بتتاوبي وفاتحة بقك زي سيد قشطة

(يا ستير يا رب)

وشايفك وأنت بتدوري على القملة..ق..قصدي على التوكة اللي في

شعرك ^ - ^

وشايفك وأنت رابطله راسك وأنت بتنضفي الشقة

(وبيحاول ينسى)

وشايفك وأنت بتنطقي الإنجليزي غلط وأنت بتكلمي رانيا

(مين رانيا أصلاً)

وشايفك وأنت ماسكة الشبشب وبتذاكري للعيال

وشايفك وأنت بتبحلقي في الأرض

وتدوري على دبوس الطرحة اللي وقع منك

(قلنا خدي بالك واشبكيه في حاجه تتشاف)

وشايفك وأنت بتشدي بنتك من شعرها علشان خدت الريموت وقلبت
القناة وجابت المسلسل اللي أنت مش عاوزاه يشوفه علشان البطلة
حلوة

وشايفك وأنت صاحيه من النوم

(قمر ياخواتشي)

وأول ما النور بيتقطع بيفرح وبيقول يا رب يفضل مقطوع ... أنتوا
مش عارفين إنكم نور عونيا واللا إيه.
وأول ما ييجي هو اللي بيصرخ
وشايفك وأنت ماسكه الكتاب وقاعدة دلوقتي زي الأروبة
(اتعدلي وابتسمي وحطي رجل على رجل)

على فكرة بيراقبك

آه والله

وربنا ما يحرمكوش من بعض.



تعرفني (لنراي) إله جوارك بعبث



لما تلاقيه وأنتوا راجعين من كارفور وشايلين الكياس راح فافعك

مقص برجله وطلع يجري على السلم ...

(ده بيتسابق معاك عاوز يفرحك)

لما تصحي على صوته وهو بيلطش لك بالأقلام ويقول لك..قومي

صلي قيام الليل.

(بيحبك وعاوزك تدخل الجنة)

لما تطلبي حاجة مش بينساها

(معلش هو البيروسول طلع معاه صدفة وهو بيدور على مزيل العرق)

لما يقول لك تستنيه كل يوم ورا الباب

و يرزحك في رجلك..

(غصب عنه ... غصب عنه)

لما يصحى قبلك ويمشي على طراطيف صوابه

(علشان يهرب)

لما ينام بعدك ويظمن عليك

(بيفكر يقتلك)

لما تلاقية فجأة وأنتوا بتاكلوا خطف من إيدك ورك الفرخة ونزل

فيه أكل

(هو بس حب ياكل من الحطة اللي أنت أكلتي منها بشفايفك)

لما تلاقية هبش من إيدك كباية العصير

(عاوز برده يشرب من الحطة اللي أنت شربت منها أصله بيحبك)

بيجيب لك طلبات البيت

(ماعد الشامبو اللي طلبتيه لشعرك)

لما تخرجوا بيشيل الولد على قلبه

(علشان تشيلي أنت الأكياس يا حلوة)

بيأكلك بإيده وبيزنق دماغك في ركن المطبخ ويحط اللقمة في

بقك

(علشان تبطل رغي)

بيشكر فيك قدام أهله

(علشان ما يشمتوش فيه)

بيجيب لك هدايا

(الشوار اللي بيكهرب)

بيفليكي..ق..قصدي بيسرح لك شعرك ويعمل لك ضفاير

(رومانسي)

بيفسحك ويوديكي البحر

(علشان تغرقني)

بيكتب فيك شعر

(الحلزونة يا أما الحلزونة)

أهو دهون الحب ^ - ^

شفتي بقى

وربنا يحبه فيك كمان وكمان



في الركن البعيد العادي

اختاري مكان هادي في البيت

كرسيين وترابيزة

هاتي ورقة وقلم

نادي جوزك وقعديه

هزي اللمة

وبرقي

خدي نفس عميق واسألينه الأسئلة دي وخليه يختار إجابة من الثلاثة:

السؤال الأول

- لو أنا مت بعد الشر عليا يا حبيبي

حاتعمل إيه؟

١- طبعًا حافرح وأتجوز واحدة تانية.

٢- حافضل حزين طول عمري ومش حاتجوز تاني.

٣- حازعل شوية وبعدين للأسف حاضطر اتجوز ...علشان العيال

لو اختار الإجابة الثانية يبقى بيخاف منك

وأنت شخصيتك قوية

(طول ما فيك روح)

👉 السؤال الثاني

★ لو عملت ثورة واعتصمت في ميدان المطبخ

وطلبت تكتب لي كل أملاكك باسمي

حاتعمل إيه؟

١- حارميك من البلكونة

٢- حاسيبك جنب الأنبوبة

٣- حافض الاعتصام واقتلك

لو إختار أي إجابة من الثلاثة

يبقى صريح ... صريح ... صريح

وعرفتني تختاري

السؤال الثالث 

★ عمرك فكرت تتجاوز واحدة ثانية؟

١- أيون

٢- طبعًا

٣- آه

لو اختار أي حاجة

يبقى صادق يا حبيبتي صادق

ومش بيحب الكذب

ما شاء الله عليه

السؤال الرابع 

★ أنت لسه بتحبني زي زمان؟

١- لا

٢- أنت مين أصلاً

٣- ولا أعرفك

معلش يا حبيبتي أنت فاجئتيه بالسؤال

ولا كأنك سألتني

عدي على اللي بعده

السؤال الخامس

★ إيه أكثر حاجه بتعجبك فيا؟

١- بتفكريني برينا كل ما أشوفك

٢- باستغفر ربنا كثير وأنا معاك

٣- الناس بطلت تحسدني

شفتي ... طول عمرك متدينة

وقربتيه من ربنا.

السؤال السادس 

★ إيه رأيك في شخصيتي؟

١- هي فين O_o

٢- طب وريهالي الأول:

٣- يعني إيه شخصية ^^

معلش يا حبيبتي

ما يقدرش يجاوب على حاجه ماشافهاش

إنسان أمين أمين ...

طول عمره أمين

خلصنا كدة

اطلعي بقى فوق

واقري الأسئلة الستة دي تاني

واوعي إوعي تتغندري

وتسألها لجوزك

أَبَدًا أَبَدًا

مش كل الكلام يتقال



جبر الخواطر

في حاجه اسمها كدة .. جبر الخواطر
يعني لما تلاقي جوزك جايب لك هدية بسيطة على قد فلوسه
تفرحيه وتبينني إنها عاجباك ..
(ركزي بعد كدة واستلمي وحوشي لحسن يتجاوز عليك لما الفلوس
تكثر)

يعني تعمل لها مفاجأة وتتجاوز عليها
... أا .. قصدي تجيب لها هدية
(يعني لما تلاقي مراتك عامله كيكه وحرقتها
تعمل نفسك مش واخذ بالك)

وتاكلها وأنت مبتسم وتقول تسلم الأيادي اللي بتطبخ لولادي

(ابلع شاي بلبن بيساعد)

يعني لما تلاقيها ضاربة شعرها في الخلط وحاطة كاري

علشان يصفر واشترت توكة



وفستان جديد من عند أم نسمة تفرحها وتقول لها إيه ده

هو القمر جه عندنا يا ولاد

(حاول ما تضحكش .. ممكن تبص للنجفة وأنت بتقول كدة)

يعني لما تطخن بعد الولادة ما تقولهاش في وشها وتجرح شعورها

(اتصال من مجهول إنك بتدور على عروسة حايفسها النص)

يعني لما يزعلك ويعمل نفسه عيان تسامحيه وتعملي نفسك قلقانة

وتعديها وتفتكري له الخير وتجري عملي له كمادات

(بلاش الحقن)

يعني لو حابة تتكلم اسمع لها

(حاحكي لك المسلسل التركي اسألها البطلة حلوة واللا لاء

وهي حاتتكتم وتبطل وتقوم تعمل لك شاي

يعني لو حاغير القناة علشان الماتش تقعدي ساكتة

(ممکن تدعي على الفريق اللي بيشرجه في شرك وخدي راحتك

يعني لو طلب أكله تطبخيها فوراً ...)

(زودي السمنة خليه يطخن علشان البنات ما تعاكسوش)

يعني تفكره بأول مره شفتيه لما جه يطلب إيدك

(انسي القميص الأخضر والبنطلون البني هو مش حا يعمل كدة تاني)

يعني تفكرها بيوم ما خرجتوا أول مرة بعد كتب الكتاب

(معلش انسى اللي حصل في المطعم

كانت جعانة ما تحكيش الجزء ده)

يعني لما تنادي عليها تدلعاها باسم جميل

(لو فتحية قولها لها يا فيفي...عنايات يا توتو..انشرح يا شوشو

...أشجان يا جيبي...وكدة)

يعني تقولي للولاد بصوت يسمعه لما يرجع من الشغل ويفتح الباب

بابا حبيبنا القمر جه

(هو كويس ما تقلقيش حا يضحك بعد شوية هو بس خد باله من

شعرك روجي سرحي)



عبراً تسعيناً من زوجي

عزيزتي حوا

انتبهي وركزي

جعاان

نداء عاطفي يطلقه الزوج فور دخوله البيت ويلاحظ تشوش في
الرؤية وظهور علامات الإرهاق والتأثر.

(ننصح بسرعة الغرف والقلبي والتحمير حرصاً على سلامة الزوجة

ونبشركم بعدم انتباهه لغياب الملح في الأكل لأنه جعان)

وما تقوليلوش ساعتها إيه رأيك في تسريحة شعري

أنا رايع أنام

جملة تحذيرية قد تظهر بصيغة إخبارية (بس هي مش كدة خالص) يلاحظ فيها رفع وتقوس الحاجب الأيسر وإشهار إصبع السبابة أمام وجه الأطفال لكنها في الحقيقة موجهة للزوجة ..

(علشان تبطل تسرعي كل شوية

وتقول للعيال وطوا صوتكم بابا نايم)

الشأأأأ

صرخة رعدية تسمع على المغربية

بعد استيقاظ الزوج من النوم العميق.

(ننصح بالاتجاه فوراً إلى المطبخ وإعداد الشاي وترديد أذكار المساء)

آأأأأ

حروف مبعثرة تخرج عفويًا من فم الزوج مع هز الرأس وارتعاش

الجفن الأيمن مع ضيق العين وازرقاق الشفتين عندما تبدأ الزوجة في

الشكوى من أخواته يتبعها عاصفة رعدية.

(ما تقوليلوش دول اخواتهمهمن كان ..عيب)

وابقي خلصي حقلك من إخواته البنات أول بأول في ساعتها

على طول واللي تشد لك شعرك شدي شعرها وخالصين

مش عاوزة حاجة من برة

رسالة قد تبدو رومانسية لكنها انتقامية تحذيرية تصل على

هاتفك النقال

(علشان تبطل تنزليه تاني يجيب البامبرز بعد ما طلع السلم

يا مفترية)

لييييه

سؤال استنكاري! استفهامي؟

بعد طلب الزوجة ل ألف جنية علشان تجيب عباية جديدة لفرح

سامية.

(في هذه الحالة رجاء القبول بأي مبلغ وكفاية تجيبي طرحة

جديدة وطرزي العباية اللي عندك بزراير بيجامته الكحلي)

بأقول لك إيه

مع مد حرف الياء .. جملة رائعة تنهي الحوار فجأة وتؤدي إلى هرب

الزوجة مع سماع صوت عجيب

وهي تنسحب من أمامه ...

إهيء إهيء إهيؤاً

(ده لما تنوي النكد يا حبيبتي)

(عارفاكي أنا عارفاكي)

وبعدين بقى!

(ده لما تطولي في النكد)

ياااه أخيراً

لأ .. لأ ... مش بيقولك، أينعم هو فرحان بس هو أصلاً ما خدش باله

إنك سرحتي ولبستي شيشب ...

(ده الأهلي جاب جون)

أنا بحبك

وأنت أجمل ست في الدنيا وباعيش معاك أجمل أيام حياتي؟

(وفي الحالة دي خلاص هو أكيد اتجوز عليك)

بوسي

يا بوسي يا بسبوسة

أيوه يا ماما

طنط تهاني الخاطبة جت ومعاها صور شوية عرسان وأنت تتفرجي
وتنقي وتختاري.

- أزيك يا تونت

- أهلاً يا بوسي والله تونت طالعة من بقق زي العسل... خدي شوفي
كدة على طول إيه رأيك في العريس ده... مهندس بترول وعنه

٢٨ سنة واسمه تامر.

- لأ .. ده حواجه بتسلم على بعض .. مش عاجبني

- طب مايسلموا براحتهم... مش اخوات..

طب بلاش خدي ده دكتور أسنان وعنده ٢٦ سنة واسمه وسيم.

- لأ ده مناخيره مببطة ورموشه قصيرة وعنده ودن أكبر من

التانية

مش عاجبني

-طيب شوفي شوفي .. ده بقى مش حاتكلمي ولا تنطقي ... رامي ...

مدرس ألعاب..شعره سايح أهه والأوصة على جنب أهه سايحة على

عنيه

وممكن أكلمهولك يفرق لك شعره من النص يوم الخطوبة.

- لأ شكله بلدي وفلاح

-فلاح!

طيب استني شكلك عاوزه عريس كدة أستاذ ومهندم ...ما فيش

غيره

- هاتي يا تونت وأنا أنقي لوحدي.

- خدي يا ضنايا الصور كلها.

- ده كويس أبو عين خضرة ده صحيح شعره مفلل شوية بس مش

مشكلة ... اسمه إيه.

- زين ما اخترتي يا بوسي ... اسمه جعص أبو المناديل ده دكتور

بيطري

قد الدنيا وغني ومؤدب وعيلتهم كبيرة قوي من الشرقية.

- ؟؟؟ مش عاوزه جعص اسمه مش عاجبني..أنا عاوزه ده.

- وريني..أااه...معلش يا حبيبتي ده خطب خلاص.

- طيب حاطه صورته ليه طيب اللي بدقن ده اسمه إيه؟

- بس ده الأستاذ حنفي..طلباته مختلفة شوية يا بسبوسة بلاش منه

- ليه يعني يا توونت؟ ده حتى عادي جدًّا وخدوده كبيرة.

-عاوز واحدة شعرها أصفر وعنيها خضرة وصارخة الجمال

ومتفجرة الأنوثةمممم..وأنت جمالك هادي ياختشي ومش

بيصرخ.

- أيوه بلاش لحسن يتجوز عليه ... طيب خلاص حاوافق تامر اللي

حواجبه إخوات ييجي وأمري لله حاستحمل منظره.

- طيب هاتي بقى بياناتك بالكامل استني لما أطلع النوته.

- اكتبني يا تونت ...أنا الحمد لله وما شاء الله عليه ر بنا يحرسني

معايا ليسانس وباحضر الماستر

-يا ساتر يا رب بتحضري!!! ليه يا بنتي ...اللهم اجعل كلامنا

خفيف عليهم.

- وباحب الكراءة والرسم على الزجاج.

- حلو وأهو تلوني الكاسات والكبايات.

- وعندي مدونة على النت

باكتب خواطري ... وأكاونت على الفايسبوك.

- وماله طيب بتعرفني تطبخي

- طبعا ومتابعة الشيف شربيني ولك في شغل البيت يا بسبوسة؟

- ممم ...بدأت يا تونت وعملت إمبراح لماما سندويتش جبنة

بطماطم.

- طماطم ...

طب طلباتكم كدة في الشبكة والمهر والحاجات دي إيه علشان لو

الباشمهندس تامر سأل.

- أنا متواضعة جدًّا

وإحنا حانسهل عليه كل حاجة ... شوفي يا تنتوتة

عاوزه شبكة ألماظ زي ريهام،

ومهري مايبقاش أقل من سوزان،

والخطوبة تكون في فندق كبير زي هوايدا،

والفرح كمان زي إلهام،

وشهر العسل في تركيا زي علا،

وعاوزه عنده عربية زي خطيب إبتسام.

مين كل دول يا بوسي؟

بنات عمي وخالي.

اللا صحيح أنت اسمك الحقيقي إيه يا بوسي؟

لازم يعني يا طنط

أيون يا حبيبة تونت

باتعة مصباح الشحات أبو نجمة

مفجأة

في بيت دافئ كانت ترتجف وهي قلقة على زوجها الحنون، تتنقل

بين نافذة غرفتها والباب وفي يدها الهاتف

وفجأة.....

- مساء الخير يا حبيبتي

- مساء الفل يا حبيبي إتأخرت ليه أنا قلقت عليك؟

- أن أن أأأأأأ مفاجأة

- إيه ده هدية .. مش معقولة!

مش مصدقة نفسي.

- آه والله شفتي ... حاجة بقى إنما إيبويه.

- طب وريني كدة.

- لأ إستني أنا اللي حافتها علشان ما تبوظيش العلبة.

- طب هات بس ما تخافش.

-قلت لك لأ لازم أنا ... ده أنا دافع فيها دم قلبي

- طيب بسرعة افتحها أنا فرحانة ربنا يخليك يا حبيبي يا رب؟

- أهه ... شفتي خاتم ذهب عيار ٢٤.

- مش شايقة نزل إيدك أنا قصيرة مش شايقة ... هات بقى.

- ياااه حا ياكل من إيدك حتة ... مبروك عليك.

- ربنا يخليك يا رب.

- بس ما تغسلش بيه المواعين بقى.

- حاضر.

- وخليه للخروج بس لحسن يتبهدل واللمعان يروح.

- حاضر.

- وشيليه في علبته.

- حاضر.

- وفرجيه لمامتك وكدة.

- حاضر

وبعد أسبوع

- ياللا بينا نروح لماما إلبسي بقى وما تنسيش الخاتم اللي جبتهولك
الإسبوع اللي فات.

- حاضر.

- يا رب الأكل النهارده يطلع حلو زي الأكل اللي طبختيهولي
يوم ما جبت لك الخاتم.

- يا رب.

وبعد شهر

- ها يا حبيبي كدة لبسي حلو والعباية والطرحة .. شوف كدة ..
والجزمة والشنطة .. أنا حلوة؟

- طبعا فاضل بس تلبسي الخاتم اللي جبتهولك الشهر اللي فات ... ده
فرح أختك وكدة.

- حاءااضر.

وبعد سنة

- داداداداداداداداد شفت لون شعري.

- حلو جدًّا ولايق على لون الخاتم.

- خاتم إيه!

- اللي جبتھولك السنة اللي فاتت.

- آاااه صحيح.

وبعد ستين سنة

- طقم شنانك على الشراحة يا حج.

- أشلي بأدور على الخاتشم اللي جبتشھولك قبل ما تولدي باشم

علشان ألمعه وتلبشيه يا حبيبتي في فرح شارة بنت شعاد.

- ربنا يخليك ويديك طولة العمر يا حج.

- تعيشي يا حبيبتي ... بش كان خاشم تشحفة

وعمري ما شفت شيه.

سوية كلام

بيقولوا الحب بعد الجواز مش موجود

وإن الخطوبة أجمل فترة في الحياة

وإن .. وإن ... وإن

لأ .. طبعًا

الحب مش وردة وقلب وغنوة

وشوكولاتة وورد وبنت حلوة

الحب بيتترجم لأفعال إيجابية يمكن مش بتشوفوها .. بس

حاتحسوها

طب ... قولوا أنتم بلاش أنا

بابا وماما طول النهار قدامكم صح؟ فاكرين يوم ما بابا اتأخر لما

كان مسافر ماما وقفت إزاي تستناه رايحة جاية بصيتوا لوشها؟

شفتوا الخوف والقلق والفرع

سمعتوا دقات قلبها وهي خائفة

ما هو ده الحب

إنك تخاف على حبيبك من الخطر؟

شفتوا بابا وهو شايل شنطة سفر

ومعاد الطيارة بعد ساعة

وقلبه بيتقطع وهو بيبوس رأس ماما وبيمشي ودموعه بتجری على

خده .. أول مرة تشوف بابا بيعيط

صح!!؟؟

ما هو ده الحب

إنك تكره فراق حبيبك؟

علشان غالي عليك قوي وبقي حنة من جواك

فاكر لما ماما كانت عيانة وحرارتها عالية وبابا واقف في المطبخ

بيطبخ بدلها وهو راسم على وشه ابتسامة حنان

ابتسامة موجوعة

ومخنوقة بألم

ما هو ده الحب

إنك تتألم لألم حبيبك لأنك مش عاوزه يتوجع

شفتى بابا لما مر بظروف صعبة أد إيه كانت ماما واقفة معاه

واستحملت حاجات كتير

ما هو ده الحب

على الحلوة والمرّة ...

وساعات من حلاوة الحب المرارة بتروح وتلاقي الحبيب راضي بحال

حبيبه حتى لو بيشحت

فاكر لما ماما فضلت واقفه تصحى بابا علشان صلاة الفجر وراسها

كأنت بتقع وفضلت لحد ما قام وصلى

ما هو ده برده الحب

إنك تخاف على حبيبك؟ من نار جهنم.

مش تكون سبب فى دخوله نار جهنم

يبقى الحب مش رغبة جسدية فقط

وما ببنكرهاش

وديننا الحمد لله بيوجه الغرائز صح
الحب ... حنان ومودة ورحمة مع بعض
وموجود جوانا فعلاً
حايطلع حايطلع
بس كل شيء بأوان.



عجفريّة (لستى)

إحنا كستات عباقره الحقيقه واخترعنا أكثر من لفه للطرحه ..

الحجاب الفرعوني

وده عبارة عن شويه طرح فوق بعض على شكل هرم وبتظهر البنات

لو قصيرة من أسفل الطرحه بشكل ملحوظ والطرحه دي ما

بتتحركش حتى لو في رعد وبرق وبتدفي في الشتا.

حجاب شم النسيم

وده حجاب مبهج ويوحى بالسعادة والفرحة شبة فساتين صفاء

أبو السعود الجميلة كدة بس للأسف في أحياناً جرس بيرن

في ديل الطرحه

(آه والله جرس وبيرن)

علشان لو أنت بتحود من على الناصية بالعجلة هي تهز راسها وترن

الجرس تقوم أنت تسمعها وإيه بقى ... ما تخبطهاش

حجاب سوبر مان

وده بيركبولة كدة من فوق وشاح زي بتاع سوبر مان وبيثبتوه

بدبوسين على الراس من على الجنبين

وحا تلاقية بيطير وراها

(لو مراتك وزهقان منها اشترهولها وزقها من البلكونة وقول إنها

كانت بتقلد سوبر مان)

حجاب البنت المقموصة

وهي بصراحة مش مقموصة ولا زعلانة من حد

ولا متكبرة ما تظلموهاش

هي بس خيفة تهز راسها فوق وتحت وتقول أهلا وسهلا إزي

حضرتك وما تقدرش تبص يمين لما تنادي عليها وتقول أيوه

لأن قفاها حايبان

والطرحة يا دوب خنقاها ومدخلاها في رقبة الفستان.

الحجاب الفسفوري

وده مفيد جدًا لو النور اتقطع وأنتوا في الشارع حاتعرف مراتك على طول وممكن تنشئ على دماغها وتحذفها بأي طوبة واهي فرصة وما حدش شايفك .. وأول ما النور ييجي بلاش تفرح وتقول هياييه لأنها حاتعرف.

حجاب صندوق الدنيا

وهنا حاتلاقي مفاجأة تحت الطرحة علبة سمينة روابي
أو علبة آيس كريم فاضية
والنوع ده مفيد جدًا
لأن ممكن تشيلي فيها أي حاجة
الموبايل مفاتيح العربية سندوتشات وممكن كتاكيت
(كتاكيتو بُني)

عبقرية دي واللا مش عبقرية يا متعلمين يا بتوع المدارس



السرفه سحر

- في ناس لما تفضفض معاهم يعملوا كدة:
- الإمتحان قرب ونفسي أذاكر
- مش حاتلحق مافيش وقت
- أهو حاحاول ألقط يمكن ربنا يكرمني
- ماينفعش أصلاً كان لازم تذاكر من أول السنة.
- أنا حليت وحش في الامتحان
- شفت مش قلتلك طول عمرك فاشل
- أنا قلبي مقبوض
- يبقى حاتسقط.

- أنا خائف

- لازم طبعا تخاف مافيش أمل.



- مراتي مدوخاني
وكل سوية تغضب
وتروح عند أهلها

- أنا لو منك طلقها
- طب ليه بس أنا بحبها
- إتجوز عليها زيزي وأديها.
- ؟؟؟ هي بس ساعات بتتغندر عليه.
- ولع لها في العباية البرتقاني ... واحرق قلبها على الطرح الفوسفوري.
- هي طيبة مش عاوز أجرحها بس المشكلة مامتها
- بص أول ما حماتك عينها تروح في النوم بلغ عنها وقول إنها خلايا
- نايمة وكانت بتعمل كحك العيد في رابعة.
- هي عارفة إن روعي في العيال وبتستغل كدة

-اقتلهم واقهرها عليهم.

- مش قادر أعيش من غيرهم

- انتحر علشان تحسسها بالذنب.



- أنا رحت للدكتور

وحعمل عملية علشان لقي عندي ^&/#\$

-ربنا يستر.

- مالك بتقولها كدة؟

- لا مافيش .. بس ربنا يستر

طب قول لي هو إيه ال ده اللي حا يشيلهولي من بطني.

- بلاش تعرف أحسن .. وربنا يستر

- طب يعني حا أموت واللا إيه؟

- كلنا حنموت وربنا يستر.

- طب أنا خايف ومرعوب وركبي بتخبط على الجيران.

- بلاش تخبط عليهم بالليل وربنا يستر.



- حاسة إن جوزي متغير من نحييتي

- يبقى إتجوز عليك فيفي الرقاصة.

- بعد الشر .. أنا اللي حاسة إني مش زي زمان

- أصلك لظلظتي وبقيتي شبه فوزي.

- عندك حق أنا فعلا بقيت غريبة.

- وبقيتي كئيبه كمان وودانك قشفت ورموشك وقعت وعمودك

الفقري بيرقص ماكارينا.

- بس دمي خفيف صح

- مش واخدة بالي قوي.

- طب إيه رأيك ممكن أقص شعري زي ميسي مثلا أو أضربة في

الخلاط زي شيكابالا

- الخلاط اتحرق.

★طب حاعمل ريجيم زي بتوع الراج الأكر

- ولا رابع ولا فالح طول عمرك طخينة يا أمينة.

- طب حاشري لبس الجديد

- مش لما تخسي الأول!

- طب حاحاول أجدد حياتي وألبس له جيبة بكرانيش

- وتجديدها ليه مش لما تعرفي الأول هو اتجوز عليك واللا لأ.

- طب هو برده طيب وابن حلال

- متهيألك ده بياكل الفول بالمعلقة.

- ده احنا لنا ذكريات حلوة مع بعض

- بأمارة ما زعلك من سبع سنين كدة وقال لك يا فاشلة لما البامية

اتحرقت.

- أنت بتفكريني ليه

- علشان تفوقي أنت لازم تسيبي البيت وتطلبي الطلاق ده مش

حاسس بيك.



يا طيبين

الناس دي بتبقى عاوزه بس حد يسمعها

كلام وبس

وبيكملوا حياتهم تاني وهم فرحانين

اسمعوهم وقولوا كلمة حلوة.



عروسة الحور

البنات كدة عرايس في مولد كبير
من أول ما تتولد
-مبروك يا أستاذ كمال اللي جاب لك يخلي لك
وعقبال ما تشوفها عروسة
- كلي يا حبيبتي علشان تكبري وتلظلي وتبقي عروسة
- حبيبة تيته تعالي حاحكي لك حدوتة
ومش بتكون حلوة وملتوتة إلا لما يتجوزوا
ويعيشوا في تبات ونبات ويخلفوا صبيان وبنات.
وتبدأ البنات تكبر وترسم

(عروسة المولد)

وتشتري (عروسة) باربي وتلبسها وتقلعها وتسرح لها

وتلون خدودها بالألوان الفلوماستر

وتخلع دراعاتها وتكسر دماغها.

وبعدها تتفرج على فساتين الزفاف والدبلة والطرحة

وصور المخطوبين وتحلم

واتبرمجي يا عنايات على كدة

شغلتك في الحياة تبقي عروسة

اللبس والتفكير علشان كدة والحلم في حدوتة واحدة بس

واحدة بسسسسس

مافيش أي طموح ثاني!

يا بنوتة؟

ما تخليش حلمك في الحياة عريس وبس

خليك أنت حلم كل الناس بتتمنى إنها تحققه

انجحي واعلمي إنجازات ومفاجآت خلي الناس تعرف إنك موجودة

بس بلاش تغني

خليك شيء مميز بس بلاش الطرحة الفوسفوري

وقتتها حتى لو العريس اتأخر

مش حاتحسي بوجع ولا بفراغ

لأنك مش حاتكوني فاضية

لأن في فرحة تانية وحلم تاني ونجاح لسه بيكمل في حنة تانية.

وقلبك عمران

مش هايدق على الفاضي



فول الصبي العقيم

في واحد داخ ووقع في الشارع تعالى نفوقه ونوصله بيته.

مالناش دعوة كل واهيد في هالوه يا مهبي.

السلم مش نضيف ومافيش بواب في العمارة تيجوا كل واحد مننا
ينضفه يوم.

مالناش دعوة كل واهيد في هالوه يا هنفي.

الست اللي في الشارع اللي جنبنا حايطردوها علشان مش بتدفع
الإيجار من يوم ما جوزها مات.

مالناش دعوة كل واهيد في هالوة يا هوسني.

ماما تعبانة وسخنة والمطبخ بقى شبه جبلاية القروود ما تيجي
نقوم ننضفه علشان نفرحها.

مالناش دعوة كل واهيد في هالوه يا هلبى.

أسامة تعبان والامتحان قرب تعالى نزوره ونصور له المحاضرات.

مالناش دعوة وكل واهيد في هاله يا فتھى.

في ناس غلابة جعانة كتير تعالى نعمل أكل ونوزعه عليهم.

مالناش دعوة كل واهيد في هالوه يا هنفى.

جارتنا ولادها سافروا وبقالها أسبوع مش باينة ما تيجوا نخبط عليها

ونأخذ لها كيلو برتقان ونزورها يمكن عيانة.

مالناش دعوة كل واهيد في هالوه يا صبهى.

المسجد عاوز يتنضف تعالوا نكنسه وننضفه ونعطره كدة

ونخليه قلة ونغسل الحمامات قبل يوم الجمعة.

حابقبضوا علينا مالناش دعوة كل واهيد في هالوه يا صاهبى.

عارفينهم الناس دول

منهم لله.



يا ستان ماهر

التش الغسيل واللعب والهدوم المرمية بسرعة ورمتهم
السريـر وقفلت باب الأوضة لما الضيوف جم فجأة.

طبختش للعیال وعملت لهم سندویتشات لما جوزها سد
أو كان عنده شغل واتغدى بره.

نشرتش الغسيل المرطب على كراسى السفرة والأنترا

علشان الدنيا بتشتي.

ما حرقتش البطاطس وهي بتحمرها ورمتها بسرعة في الزبالة
وقشرت تاني.

ما فكرتش تغير لون الأنترية.

ما بتحلمش تجيب ستاير جديدة.

ما غسلتش حاجه ملونة مع الغسيل الفاتح وطلعت لون.

ما وقعتش شوية كلور على الهدوم وبوظتها.

ما أكلتش نص كيس الشيبسي اللي اتبقى من ابنها.

ما أكلتش المكرونة المحمرة اللي في الآخر من الحلة شخصياً بالمعلقة.

ما قعدتش تلحس الرز بلبن من على المغرفة بعد ما خلصت توزيع
على الكاسات.

ما عملتش لنفسها كباية شاي بعد ما العيال ناموا وقعدت لوحدها
تشربها بمزاج.

ما صبرتش لحد ما جوزها يرجع واتعشت قبله مع العيال.

مين ههميينيين

أَهْلُ الْأَهْلِ الزُّوَلَار

عارفين لما جرس الباب يرن

والولاد تجري وهي فرحانة

وتقول هياييه

علشان في ضيف جاي

في ضيوف تفرح

جميلة كدة ومبهجة ومبتسمة وخفيفة وظريفة وبتيجي معاها

الفرحة وترتاح لما تشوفها وتكلم معاها.

وفي ضيوف كئيبة

تيجي وتمشي تزود همك وقلبك يتقبض وأول ما يمشوا تقول ...

الحمد لله.

على فكرة

في حاجات ما بناخدش بالننا منها:

حاول تتصل قبل الزيارة وتستأذن علشان يستعدوا - كلنا بنحب
يبقى شكلنا حلو قدام الضيوف - وأكد عليهم لو الوقت مش
مناسب يبقى بلاش.

(بدل ما تروح تخنقهم ولا أنت تنبسط ولا هم يفرحوا بيبك)

البس حلو وخلي شكلك حلو واضحك

لو في أطفال في البيت فرحيهم ولو ببونبوناية حايحبوكي قوي.

(وهاي لمامتهم شوكولاتة دي غلبانة برده)

لو رايح لزميلك ما تقفش في وش الباب علشان لو أخته الحلوة فتحت
ما تجرحش البيت.

(ولو مامته ما تدخلش رقبته الطويلة وتقول فين محمد يا طنط

وتبخلق يمين وشمال)

بلاش تبقى زي المغص والصداع النصفي تكبس على نفس الناس

وتقعد سبع ساعات وتشتكي من كل حاجة وتكرههم في الدنيا
وأنت مكشر وقرفان.

(كفاية ست ساعات)

بلاش تطب على الناس فجأة وهم مش محضرين أنفسهم

(الغسيل في الصالة، الراجل ضارب مراته وعينها وارمة،

بنتهم جاي لها عريس ومتشورة)

لما حد يقدم لك حاجة ما تتقرفش وتكرمش مناخيرك وكل
واشرب جبر خواطر.

(كثر خيرهم وبعدين ماله السحلب ما هو زي الفل)

ما تقعدش في كرسي كاشف البيت اختار مكان مستور علشان

البيوت عورة وأنت كمان يا حبيبتي بطلي تبصي هنا وهناك

لما تروح تزور حد مريض خليك خفيف وقصر، دقائق وسيبه

يرتاح وما تاخذش معاك ابنك اللي بيحب يفتش في الادراج وبيموت

في شرب البيبسي وتقعد تحكي له إزاي خطبت زيزي

هو بيكون تعبان ونفسه ينام وخصوصًا لو عامل عملية الزايدة لأنه

بيكون خلاص ناقص.

ما تروحيش لجارتك وترغي معاها الصبح وتحكي لها فاطمة عملت
إيه في كريم في المسلسل التركي وهي لسه ما طبختش ولا سرحت
شعرها وجوزها يدخل وهي ناسية وقاعدة تتكلم مع حضرتك
فيتخض من منظرها وتجيله جلطة سيببها تطبخ.

لو الشخصية اللي بتزوريها بيتهم فيه إبتلاء بلاش نظام ...

يا عيني يا ختشي يا ضنايا

الله يكون في عونك

حملك كبير معلى

(مش ناقصاك ما تزوريهاش أحسن)

لو في امتحانات عند الولاد الغي الزيارة لأن أهمهم في الوقت ده

تجوز عليها الصدقة

ويا ريت جوزك يخرج مع جوزها اليومين دول

لأنه في خطر والجيران لبعضدشيه.

في ناس مش بتحب حد يدخل بيتها بالجزم وبيتأذوا جدا جدا بلاش

تضايقوهم واقلعوها لما تدخلوا جنب الباب
(وخصوصا لو الدنيا بتمطر وبتحبوا تلعبوا في الماية)
لو ولادك بيلعبوا مع ولاد الناس اللي بتزورهم
لازم قبل ما تمشي تخليهم يلما اللعب ويرتبوا المكان
علشان حاتدعي عليك وهي بتلمهم لعبة لعبة.
مش لازم تعلقي على كل حاجة في البيت
هي الكنبه دي مش كانت هناك، أنت نقلتي السرير هنا ليه؟
وجبتي السجادة دي إمتى وبكام؟
أنت رايحة تزوريها مش تحققي معاها.
بلاش تقوليها الكلام اللي يجرح ...
مالك خاسة ووشك أصفر كدة!
أنت طخنتي كدة ليه!
مالك متبهدة كدة!
ما هي كانت بتطبخ من إمبراح طبيعي تبقى شبه حنفي ...

وأنت كمان...عارفة إنك زهقتي منها لأن الزيارة طولت بس ما
فيش داعي تصرخي كثير وتلطشي في العيال وتشدي شعر بنتك
وتهبشي ابنك كل ما يعدي علشان الضيف بيتكسف ويببقى
حاسس إنه السبب.

(تعبانة ما تعزميش حد)

أحلى حاجة الستات تقعد مع بعض في مكان والرجال في مكان تاني
علشان كله ياخذ راحتته ولما تضحكي مع صاحباتك زميل جوزك
وجاركم ما يسمعوش ضحكك ويتسرعوا .

لو أنت المعزومة كلي ...

كلي حتى لو الأكل منيل ومحروق

حرام عليك يا مفترية

دي طول النهار واقفة على رجليها ونكدت على جوزها علشان

العزومة وسنينها

وما تعمليش رقيقة ومش قادرة ومعدتشي مليانة

عارفينك وفأسينك.

وأخيرًا

خدوا نية لأننا بننساها

(عيادة مريض، إدخال سرور على مسلم، حب في الله)



بنس ناس

أصلها أرستقراطية

ضحكتها شيك وبتحط إيديها على بقها

(مش كرررر هقهقهق ولوزها بترعش)

مش بتتكلم وهي بتاكل وبتمضغ وهي قافلة بقها

بتاكل البيتزا بالشوكة والسكينة

(مش بتضربها مثلثات زينا :)

لسانها معوج وبتنطق الحروف برقة

(يا مرارتي)

بتقول مش رحت .. مش أكلت ... مش عرفت ...

(يا مرارتكم)

بتقول ميرسي

(مش مششكرين يا عم الحج)

باااي

(مش سموعيكو)

وبتقول زي ما بأقول لحضرتك يا تااوونت

(مش زمبؤلك كدة يا طاانط)

بتتعد على طراطيف الكرسي وبتسلم بضوافرها.

مش بتعرف يعني إيه تقلية وفتة وبراهيم وياااي بقی.

بتفطر كورن فليكس

(مش سندوتشات الفول اللي بنضربها كلنا)

مش بتاكل رنجة وفسيخ

(فاتها نص عمرها)

عمرها ما نضفت ولا سمك ولا فراخ

(في دي يا بختها)

كل شنطها من عند

Abo Nesma

(ماركة وكدة)

والشوزات من عند

Happy gazma

(دي جزم فرحانة وبتمشي لوحدها)

جدها أصله تركي وجدتها جبنة تركي

(هههه... حلوة)

خال مامتها عنده فيلا على ترعة المحمودية

(وفي معدية... أأأأ... قصدي لانش)

دي مواصفات بنات الناس حسب تقييم الناس

على فكرة

المحجبة المحترمة المتربية اللي بتمشي زي الملاك وما تحسش بيها

برده بنت ناس

واللي بتغض بصرها مش علشانك .. علشان ربنا .. برده بنت ناس
واللي بتغير طريقها وتمشي من طريق أطول علشان ما تعديش على
قهوة ... برده بنت ناس

واللي ساكنة في بيت بسيط ولبسها بسيط وما تعرفش ماركات ...
برده بنت ناس

واللي بتاكل فول وطعمية وشاطرة في التقلية بنت ناس
واللي بتتكدبل في عبايتها علشان طويلة وجزمته كوتشي ... برده
بنت ناس

واللي ما بتعرفش فرنساوي وبتقول شكرا ومششكرين.. برده
بنت ناس.

آه والله زمبؤلكم كدة

ياللا سموعيكو ومششكرين



مشية الستات

لستات أكثر من مشية عارفينهم؟

◀ مشية البطة المرحة



ودي لما الست من دول بتلبس كعب عالي وهي هلامية حبتين
وغالبًا الجيبة أو الفستان بحزام بسلاسل وفيونكات وبتحصل زلازل
وبراكين واهتزازات زي عروض فرقة الفنون الشعبية كدة.

وآلف مبروك

◀ مشية العسكري

دي بنوتة طيبة بس هي خجولة جدًا حاتلاقوها مندفعة ومايشة

بسرعة وحاضنة الكتب ولابسة كوتشي وما بترجش لورا
ومخضوضة وبتبرق وبتبص حوالها كثير زي المدمنين ودي غالبًا
بتقع وبتتكعل في رباط الجزمة
وعندها إصابات كثير.

وَأَلَفَ سَلَامَةً

◀ مشية البجعة

ودي أعراضها بتظهر لما البنت بتلبس جزمة الباليرينا الفلات دي
بتاعة البالية ووقتها بتكون مقتنعة إنها بجعة من اللي بيغرقوا في
بحيرة البجع ما تقلقوش وسيبوها تعدي الشارع حتى لو على
طراطيف صوابعها ولما توصل سقفلوها.
وربنا يهدي

◀ مشية البرنسية

ودي سايحة ... ق ... قصدي عندها إحساس إنها من السياح وبتتفرج
على الناس في الشارع كأنهم تحف وآثار فرعونية وبتشيل شنطة
إيديها قصيرة وكعب عالي جدا ونضارة شمس وعقد كبير أد كدة

على صدرها وبتعقد الطرحة زي ماجدة في الأفلام بتاعة زمان

وربنا يشفي

◀ مشية بنت الداخنة

مش عارفة ليه بيقلوا على الست الوالدة كدة

رغم إن هي اللي داخنة مش أمها

ودي أصلاً سرحانة وبتمشي على مهلها في خطوط لولبية غير

مستقيمة ورجليها بتلف على بعضها وبتتفرج على كل الفتارين

والمحلات وفي الآخر مش بتشتري حاجة.

وربنا على الظالم والمفتري

◀ مشية المثلث

ودي ثنائية غالبا بيكونوا أختين

أو بنتين أصحاب أوي

حاتلاقهم ماشيين لازقين راسهم في بعض ودي راس المثلث

وحبياتهم أو العبايات نازلة على واسع ودي قاعدة المثلث

والقصيرة منهم متشعلقة في ذراع الطويلة وكل شوية يتوشوشو

ويضحكوا

ولو لابسين كعب عالي بيعملوا دوشة

ولو لابسين فلات الطويلة منهم بتتكعبل في القصيرة وبيقعوا سوا

اعترفي وقولي أنت بتمشي إزاي



حاجان ما تنسيس

صاحبك الطيب اللي كان قاعد جنبك في ابتدائي.

كراسة الرسم والألوان الشمع

جزمة المدرسة الجديدة اللي بتوجع وتعمل بقبيقة في رجلك.

يوم تجليد الكتب والكراسات.

ريحة الأقلام الرصاص الجديدة.

البراية والأستيكة أم ريحة حلوة.

كيس الساندويتشات وجرس الفسحة.

كباية المية اللي بتتفتح وتتقفل ولها غطا.

حصة الألعاب والفرحة بالصفارة

رحلة الأهرامات وصورتك عند أبو الهول مع صحابك.

شف الخرايط وتلزيقها في الكراسات.

ريحة كحك العيد وقعدتك جنب مامتك وهي بتعمل البسكوت
ولما تديك عجينة وتبوظها وتخبزها لك وتاكلها وأنت فرحان.

فانوس رمضان اللي فرحت بيه وطفيت النور

علشان تتفرج عليه مع إخواتك.

شكل فلوس العيدية وأنت بتعدها.

مراجيح العيد وألوانها.

آخر لحظات قبل الفطار في رمضان وأنت بتحلم بالمية والعصير.

فوازير رمضان وأنت بتفكر في حلها وتكتبها.

لمة العيلة والسهر وصوت ضحكهم ورننتها وحكاوي زمان

وذكريتهم وأنت بتنعس وتنام على رجل مامتك.

اللعب مع ولاد عمك والعراك معاهم وضربهم والغيرة الشقية.

خروف العيد وصوته وهو بيأمأ

السفر في العربية أو القطر وأنت فاكر إن القمر ماشي معاك وبتعد

الشجر على الطريق والهوا بيخبط في وشك.

المصيف والبحر والشمسية والطيارات الورق والفريسكا والجردل
والجاروف وبيوت الرمل.

الذرة المشوي وأنت واقف مستني تشتري وماسك الفلوس في إيدك
وصوت فرقعته في النار والبياع بيهوي على النار بكرتونة.
حزن تيتة وضحكة جدو.

مفاجأة خالتو وهديتها.

طعم الآيس كريم ولوليتا بالفراولة.

كارت عيد الأم اللي كتبته لمامتك وباستك بوسة كبيرة
وحضنتك وفرحت بيه.

صوت مفتاح الشقة لما باباك يرجع وتجري أنت واخواتك على
كيس الفاكهة إلي معاه علشان تشوفوا فيه إيه.

النور لما يقطع واللعب بالأيدي قدام نور الشمعة والضحك على
شكل الخيال على الحيط

الفرحة وصرحة هياييه لنا النور ييجي تاني.

وحشتني نفسي وأنا صغيرة

غول طر اللأم الحمصرية

أزايذ عصير المانجة شكلها حلو لما تخلص حاخليها قزايز مية
واحطها في التلاجة.

حاجيب لبس العيد للولاد كبير علشان ينفعهم السنة الجاية.

البلوفر الأخضر بتاع رانيا حا ينفع رشا السنة الجاية بس لو خست
شوية.

بنطلون بيجامة تامر خلاص كفاية عليه كدة حالمع بيه البيت
وامسح بيه الأرض.

تي شيرت هيثم اتقطع حا يبقى روعة في المطبخ حا انشف بيه الحلل
والكبايات.

شراب خالد اتخرم... مش حرميه وحغسله والبسه في إيدي

وألّمع بيه السفرة.

شرابات نهى الفيلية اللي اتقطعت حا اغسلها برده واربط بيها البصل

واعلقه في البلكونة.

برطمانات الصلصة والتانج دي شكلها نضيف لما اغسلها وأشيلها حا

تنفع لما أعمل مربى الجزر.

كياس كارفور حلوة لما أطبقها واخليها للزبالة.

كياس بوتيك مروة الورق دي شيك لما أشيلها وأهى تنفع لما نروح

نودي هدية لحد.

علبة الشوكولاتة اللي جابتها لنا سحر جارتى مافيش داعي افتحها ما

احنا عندنا شوكولاتة كتير حاخدها في إيدي وأنا رايحة أبارك

لسامية.

علبة الكنافة البلاستيك دي جميلة لما تخلص حا اغسلها واعملها

علبة خياطة.

الجوافة رخصت ورمضان قرب لازم أشيل شوية في الفريزر علشان

العزومات والعيال.

شنتي دي موديلها قدم بس حاخليها واحط فيها الورق وشهادات
الميلاد والبطايق في الدولاب.

كرتونة المكنسة الجديدة دي حاخط فيها شوية كراكيب
وازقها تحت السرير.

فستاني الدأنتيل البمبي اللي حضرت بيه فرح تهاني الله يرحمها سنة
١٩٥٠ حا أشيله قماشته حلوة ممكن ينفع سعاد تعمل منه جيبة.
آه يا دماغى يا ضهرى يا ركبى يا مفاصلى ... روحوا ناموا يا ولاد.



الشوايش عطية

على فكرة مش شاويش
ولا عطية ولا غفير ... إنها جميلة
وما بينكدش على البنات إلا الكلمتين دول
إلبسي ياخشي كدة وأنت خارجة وحتي في وشك حاجة
طول ما أنت عاملة كدة ماحدش حيبصلك
ومش حتتجوزي وقصري الطرحة دي
ولو البنت فتحت بقها وقالت كلمة
يقولوا لها ... خليك قاعده وخلي الحجاب ينفعك!
كل الشباب والرجالة ما بيحبوش المقفلة .. يا مقفلة

والمشكلة إن في شباب بيسمع وبيعهم وخلص يبقى ملتزم

ويقول لك أنا عاوز عروسة فاهمة

بلاش المقفلة أوي دي

لا هي مش مقفلة أنتوا اللي مش فاهمينها

مش معنى إنها بتخرج بالنقاب قدام الشباب الغرب تبقى غفير.

مش مخبية جوز فراخ تحت العباية على فكرة ومافيش أرناب

مش معنى إن طرحتها طويلة ومش بتحط ماكياج ولا بسة جوانتي
تبقى شاويش.

مش معنى إن طرحتها عادية ولبسها بسيط تبقى ما عندهاش أنوثة.

مش معنى إنها جدعة وبتعتمد على نفسها تبقى راجل.

مش معنى إنها واثقة في نفسها تبقى غفير.

لو شديت ودنها حاتسقف زي البنات المزز اللي ماشيين في الشارع

ولو خبطتها على مناخيرها حاتغني

ولو كعبلتها حاتحط مونوكير

ولو شديتها من خدودها حاتجك

ولو شافت الروح حتاكله ق ... قصدي عارفة إنه بيتحط على

الشفاف

وعندها جيبة والله وفستان قصير

وبتسرح شعرها كل سنة مرة الحمد لله

بعد ما تستحمي في العيد الكبير

عارفه الفرق بين البارفان والجلانس

وعارفه إن البيروسول مش مزيل عرق

عارفه المودة ... أو الموضة

بتحب اللون البينك

(كل البنات بتحبه مش عارفه ليه)

بتحب القطط والدباديب

(وبتشترى ماديليات وسلاسل وعقود كتير)

بترسم ورد وهي بتذاكر وخطها منيل

بتقرأ شعر

هي مش فاهماه بس بتحاول

إيديها أصغر من إيديك ورقيقة

زيها زي البنات الروشين ويمكن أحلى كمان،

بترقص مع البنات صاحباتها وبتسقف وتغني

بس لما بيكونوا في البيت

نفسها تعيش

هي بس عارفة إن نظرة رضا من ربنا

أحسن من مليون نظرة إعجاب من الشباب اللي في الشارع.

ساترة نفسها ومحافظة على الأمانة ويوم ما تكون زوجة

حينزل القمر ويغسل المواعين .. ق ... قصدي حينور في البيت.

مش لازم تلبس بنطلون وتعمل لنا إنبهار في الشارع

مش لازم تطلع نص شعرها من الطرحة وترسم عينيها

زي كيلوباترا علشان تبقى بنوتة

مش لازم تلبس إكسسوار كأن حنطور ماشي في الشارع

علشان تلفت نظرك

هي ممكن تمشي وما تحسش بيها لأنها مستورة

والله بنوتة؟

بلاش تظلموها

إلبسوا يا بنات في البيت وهيصوا واعملوا اللي أنتم عاوزينه واضربوا

شعركم في الخلاط وخطوا مونوكير والبسوا جيبة ...

وكلوا جيلي كولا

أنتن عسلات



غلطه

أحياناً لما بتيجي تدور على نصك الثاني

بتحتار شوية

ساعات بتسأل وتعرف عنه غلطة

تقوم تتعقد من كل البنات أو كل الشباب

غلطة!

في ناس بتغلط

بس ما نقدرش نعمم الغلط علشان إنسان واحد (ملتزم ظاهرياً)

غلط غلطة

وبياكل والعياذ بالله ترمس في الشارع

وبيشرب استغفر الله العظيم يا رب فاننا بالتفاح
أو أخت منتقبة استغفر الله العظيم بتآكل جيلي كولا
يبقى كل الملتزمين كدة.

لأ طبعًا

على فكرة بقى

مفيش عريس متدين ١٠٠٪ لدرجة إنه بيطلع نور من ودانه
ومفيش عروسة متدينة لدرجة إن مناخيرها بتنور
(بغض النظر عن إن دماغها بتنور بالطرحة الفسفوري ...)
ومش كل شاب بدقن يبقى ملاك من السما ..
مممكن يكون بوشين واحد بدقن والتاني لأ
بس في منهم فعلا ناس زي سيدنا يوسف وزى الفل
ومش كل اللي لابسة نقاب أو طرحة طويلة ملاك ...
مممكن تكون شريرة وبتغتتاب الناس.
(وفي منهم بنات عسل زي بنات شعيب كدة وزى القمر

وفي ناس مش متدينة بس بتحبههم
التدين مش بيبان قوي ومالوش لون ولا ريحة
التدين مش بيتقاس بالمتر ولا بالكيلو
الإيمان إحساس جواه
حا تشوفيه إزاي؟
وهو لابس القميص الكاروهات الأخضر وقافل زراير الجاكيت
البنّي وفارق شعره من النص!
الخشوع جواها
حا تتفرج عليه إزاي من وراء الحجاب!
يبقى لازم نعرف كدة من الأول
مافيش حد مثالي
الغلط مش عام
أنت مش ملاك وكمان هو مش ملاك وماحدش بيطير بجناحات
وقت السحر(الخشوع جواكم)
كل واحد فينا جواه خير

ونفسه ربنا يحبه

في أساسيات دي اللي ندور عليها ..

(طول شعرها مثلاً ومناخيرها صفرة وشعرها أخضر)

وهو فلوسه ومرتبته .. كدة يعني)

يووووه ... ق .. قصدي ... الأساسيات

الحوار مهم مرة واثنين

والخطوبة أصلاً علشان كدة.

أخين حاجه لما تروح تخطب ولما يجيلك عريس تبقى

طبيعي. تتكلم بصراحة وبوضوح

وتسأل سؤال بريء وتشوف رد فعل اللي قدامك

مش عارف تتكلم قول له أنا مش محضر كلام لو حابب تسألني

عن أي حاجة

وكل ما يسألك أو تسألك تحاوب وتقول طيب وأنت؟

وتقلب السؤال عليه

سمعة الإنسان بتفضحه وتسبقه لو كان صالح بيتعرف رغم أنفه

حيشوفوه في المسجد

وعمره ما عاكس يارة

وصحابه عارفين إنه مش بيتفرج على تفيدة وهي بترقص

ولو كان خبيث حتلاقي الناس كاشفاه مثلاً

شافوه وهو بيقزقز لب في البلكونة

وكمان شافوه أكثر من مرة وهو بيضرب سندوتشات الطعمية
ومخلص فلوسه عليها وآثار الإدمان باينه على حدوده ووشه.

لازم تسألوا عليه

ما ترفضيهوش علشان مش ملتحي رغم إنه حافظ نصف القرآن
ومُصلي وبار بوالديه.

وما ترفضهاش علشان طرحتها عادية رغم إنها لابسة عباية وaaaaااسعة
وبنغطس وندور في كم العباية علشان نسلم عليها

الأخلاق مهمة قوي

الدين كله خُلق فمن فاقك في الخُلق فاقك في الدين.



نوع نادر جدًا

في نوع نادر من البنات
 يببقى عندها إحساس إن أهل العريس فلاحين ومش مودرن
 (ما حدش يسألني اشمعنى نادر أنا أصلًا مش عارفة)
 وإن أهلها من طبقه أرقى
 وبتبقى هي واخواتها البنات أو صاحباتها عاملين كدة
 شفتي بيقولوا على البارفيوم بارفان .. ههههه
 أنتوا الاتنين غلط أصلًا اسمها كولونيا
 الحقوا دول جايبين جاتو هو مش المفروض بومبونيرة فضة
 وفيها شوكولاتا

(ماله سبت الجوافة)

وتزعل قوي لو خطيبها مش عارف البانتاكور .. والشيميز ..

والتونيك .. وال . @\$#&/&*

وتبص له شذرا لو قال شكرًا يا طنط

(أصلها بتقول لمامته ميرسي يا توأنت)

وتنكد عليه لو ما جابش لمامتها فائزة كروازينية في عيد الأم

(وممكن تقتله لو جابلها شال صوف)

وتقعد تنتقده وتقول له قول كدة وما تقولش كدة وهات دي

كدة وماتعملش مناخيرك كدة واشرب كدة.

ولو حماتها سألتها تحبي تاكلي إيه يا ضنايا أعملهولك على الغدا

تطلب بيكاتا بالشامبيينون وساليزون وباستا

وهي مش عارفه اللازانيا دي مرهم واللا شتيمة

ولما تزورهم بتعيش في دور الأميرة وإخواتها الأقزام السبعة

أو بنت السلطان اللي جاية من مملكة الكرانيش

وبتمشي على طراطيف صوابها جوه الجزمة

وبتشرب المية بالشوكة والسكينة

يا بنات

ما تصعبوهاش كدة وخليها سهلة

دول ناس طيبين

وأهله دول هم اللي ربوه وكبروه لحد ما جه وخطبك وعجبك.

المجد للبنات اللي مش بيعملوا كدة؟



نصائح للزواج العريس

-

ابنك رايح يخطب ألف مبروك

دي شوية نصايح من واقع كلام البنات والستات

والصراحة هم أواريب وبيأخدوا بالهم من حاجات عجيبة

شوفي

قولي لإبنك ما يفرقش شعره من النص

لو هو متابع مسلسل فاطمة وكريم ومنك لله يا ظالمة

أنت السبب ليه قلتيله إن شعره ناعم

(البنات بتحب العريس اللي مظهره في رجولته بلاش الشعر المسبب

وبلاش يتشور.)

ركزي على الشراب

لو لقيتي الفردتين مش لون واحد

يبقى ابنك عنده عمى ألوان هاتيله فردتين لون بعض ...

البنات بتبص للشراب ولازم يكون لايق على البنطلون والقميص.

(الشاكة مهمة)

لو لابس حفاظة وحاطط جل في شعرة وفاكر نفسه أحمد حلمي ..

بلاش تكسفي نفسك واهربي

(استني عليه سنتين لحد ما يعقل الأول)

قوليله لما يقدموله كيكه أو جاتوه

ما ياكلهمش كلهم

وابقي هاتيله وأنتوا مروحين ...

(البنات بتستنى اللحظة دي)

وحا تتفرج عليه وحا تحكي لصاحباتها في التلفون .. أورايب

ياختي أورايب

خليه ما يتفسحش بعنيه في الصالون والستارة

والبراويز والسجاجيد وهو بيكلمها .. عيب ... عيب.

(وبطلي أنت كمان)

واستنوا لما يقوموا يجيبوا العصير واتفرجوا بسرعة

لازم يقص ضوافره

لأنهم بياخدوا بالهم منها ولازم يكون نضيف وظريف ولطيف

ويحط بارفان ويلمع الجزمة.

(بلاش الكوتشي وبلاش الصنادل)

(ولو لبس شبشب مش حا توافق)

خدوا في إيديكم حاجة

كيس جوافه سبت برتقان ..

ق ... قصدي كيلو شوكولاته أو تورتاية

(لو ما جبتيش حا تقول عليه بخيل وحا تمسكهاله وتذله بيها

طول عمرهم)

مش لازم بدلة وكرفطة

هي مش ناقصة خنقة

خليه يلبس قميص

ويا ريت يكون مكوي

وبلاش النضارة الشمس

أنتوا أصلاً رايعين بالليل.

مش طول ما أنت قاعدة تشكري فيه كدة كدة مش حا

يصدقوكي

علشان أنت مامته ما تتعيش نفسك.

(ووفري صحتك واشربي العصير وأنت ساكتة)

لو خدتوا معاد ما تلغيهوش

ولا تأجليه لأن بيكون في طواريء في البيت

والبنت بتبقى قاعدة بالهدوم من قبلها بتلت أيام والجزمة بكعب

عالي وضيقه حا يدعوا عليك وعليه.

(اتصلي بالتليفون قبلها واستأذني بذوق)

بلاش تقوليلهم إنه كان بينادي على سوبر مان من الشباك وهو

صغير

وما تحكيش على اليوم اللي تاه فيه في البحر.

(هي كمان بتاكل المشابك وتاهت في حديقة الحيوانات

ولقوها جنب الزرافة مش كل الذكريات تتحكي لأنه بيتخرج

وكلنا بنغلط)

ماتلبسش كل الذهب اللي عندك وتستلفي غوايش أختك

لأن لو طلبوا حاجة بعد كدة وقولتوا الظروف ما تسمحش

حايذكروك بالغوايش وهي أصلا مش بتاعتك

(ما تتصنعوش وخليكوا على طبيعتكم

والصراحة في الماديات أحسن

علشان تبقى عارفه البير وغطاه).

ماتاخديش معاك حفيدتك بنت بنتك وأول أحفادك... علشان

البنات فاقسين الموضوع ده

(حاشرب البيبسي وقال إيه عاوزه أعمل بيبي يا تيته وأنت حاشرب
تقولي أصل ما بتدخلش الحمام مع حد غريب وحاتقومي وتتفرجي
على الشقة..

(فاهمينك يا أروبة)

لو قابلوكم كويس والبنت وأنت ماشية خدتك بالحضن
وباستك من هنا ومن هناك يبقى دي علامة يا مارد

وفي قبول.

ألف مبروك

ابقي اعزميني.



(نقدفة) (سدقفة)

خليك كدة .. طول النهار في المطبخ
 ما بتفكريش غير في الأكل وبس
 من صينية البطاطس باللحمة الضاني لطاجن الرز المعمر ويا جماله
 يا حركاته يا تكاته
 واللا البيتشيفور اللي بتعمله
 كفاية فرجة على قناة الطبخ وبطلي تدعي وأنت ساجدة للشيف
 مش هو اللي حا ينقذ حياتك على فكرة.
 ما تتصليش بيه في رمضان وتقولي له
 (بحبك في الله يا شيف)

مش لازم تحكي لجوزك الفرخة بتتنصف إزاي ...

بلاش تقشري البطاطس وتقمعي البامية

وأنتوا بتتفرجوا على التلفزيون

الصبح وهو في الشغل يا لظاظ

هو مش عاوز يعرف أم محمد جارتكم بتعمل القلقاس بسلق

واللا بالكزبرة الخضرة

حاوي تبصي في المرايه قبل ما تجيبي المسلسل التركي وهو قاعد

وخدي بالك من المذيعات لو لقتيها حلوة خدي الريموت وغيري

وقولي زهقنا من السياسة

بلاش أول ما يدخل الشقه تروحي رازعاه معلقة مربى

علشان سكرك يا حبيبي خلاص كره المربى.

صحيح لازم يكون طبيخك حلو

بس مش طبيخك بس اللي يبقى حلو

ما تسألهموش كل يوم السؤال اللي مدوخ كل الستات.. أطبخ إيه

بكرة أنت صاحبة القرار ويا خوفي من قراراتك

بطلي تسيطر على تفكيره بحلة المحشي

(كل يا خويا بالهنا والشفأ أنت تشيعيب طول النهار)

إتعلمي تتكلمي وتقولي رأيك وتثبتي شخصيتك

ما تشوشيش أفكاره بطبق الفتة

وتهيمني على نظراته بحتة الكنافة

وبعدين تسأليه ببراءة وأنت بتقلبي كوباية الشاي

(مالك ساكت كدة يا خويا مش بتكلمني ليه)

هو بيكون سامعك كويس بس الأكل كابس على نفسه

حا يزهق يا لظلظ

وحا يكرهك يا حبيبتي وممكن نفسه تهفه على طبخ واحدة

تانية

نفسه في شوية رومانسية؟

وأنت غرقانة في التقلية

حاولي تقري كتاب وتتنقفي شوية واتفرجي على برامج إجتماعية

الدنيا مش مطبخ وأكل وبس

وعلشان خاطري

ما تتصليش بالشيف اللي بيطلع في التلفزيون.



يا بنوّة لي يجيدك عريس

ما تستخبّيش ورا المكياج خليه يشوفك على حقيقتك ويتصدم

أأا .. قصدي يعجب بطبيعتك، وعلى رأي الشاب محرم فؤاد ما

تلونيش خدودك ما تلبسيش حلق

أنت كدة بطبيعتك من أجمل ما خَلق

البسي فستان أو عباية الشاب الغلبان من دول بيتخيلك في أحلامه

بفستان طويل بمبي وديلة واسع وزى الأميرة مش بنطلون بركب

(البنطلون مافيهوش ريحة الأنوثة

وبعدين ما ينفعش أصلاً مع الحجاب

بلاش كعب عالي قوي لحسن تتكعيلي وأنت شايه صينية العصير

ويقع على دماغه حا يمشي

خليك على طبيعتك وبلاش تتصنعي الرقة في الكلام

بلاش أنت (كررت) تعمل إيه اسمها (قررت) ..

وبلاش (الاستكرار) اسمه (الاستقرار)

علشان حا يتصدم لما تتكلموا عن (الواكع) قصدي الواقع

اتكلمي بالراحة وبهدوء ما حدش بيجري وراكي يا شابه

الضحك بحساب وما تخبيش سنانك وبقك كل ما تضحكي

(أنت جميلة ولو مش عاجبه مع السلامة)

لما تكلمي مامتك قدامه ما تفرقيلهاش وتجزّي على سنانك

(حا ياخذ باله ويخاف ويهرب)

حاولي تسمعي له

(إديله فرصة يقول كلمتين على بعض منك لله يا رغبة يا مفترية)

مش لازم تاكلي معاه جاتوه

(بعد ما يمشي خدي راحتك)

سيبيه ياكل وما تركزيش وهو ببيلع .. لأحسن يزور ويموت ...
عيب.

لو حضرتي درسين فقه ودرسین تجويد ما تعقديهوش وتطلعي عينه
.. مش وقته

ما تحسسيهوش إنك المفتش كرومبوا
هو مش جاي تحققي معاه .. خليك ذكية في الحوار مش مهم تعرفي
كل حاجه من أول زيارة
خلي بابا يسأل عنه

لو عريس حلو ومتدين وممتاز ما تتغريش بالمظهر ودوري على
عيب فيه تذليه بيه مستقبلاً ... ق .. قصدي مافيش حد كامل ...
يووووه بقى قصدي ما تنبهريش قوي ويغمن عليك وتنشكحي
فيبان عليك فيكرهك وتطفشية

(اتقلي أنت كمان زي الفل .. خليك منضبطه

ما تبقيش مغرورة وتتكلمي من طراطيف مناخيرك وتتكبري

عليه لو هو بسيط

بلاش تتعاركي مع أخوك حماده قدامه استني لما يمشي واعجنيه

مع أختك الثانية

لو لابس حفاظة وشعره سبايكي ما تكمليش قومي اغسلي

المواعين وروحي نامي

لو اسمه حنفي أو عباس أو من عيلة أبو سحلول ما ترفضيهوش من

قبل ما ييجي ممكن يكون أحسن من اللي بتحلمي بيه.

ما ترفضيش شاب طخين أو أصلع أو بشنب أو أسمر أو صباع رجله

الصغير معوج أو خرمين مناخيره مش قد بعض علشان السبب ده

بس ... لازم تقعدي وتتكلمي معاه لأنه بني آدم يمكن يكون في

قبول ويكون الإنسان اللي يسعدك رغم أنه ... قصدي أنفك

ما ترفضيش شاب محترم ومتدين علشان

ما عندوش شقه خمس أود وصالتين وحمام دورين

أصلا كفاية الحمام الدورين

مش لازم عربية

(ممکن یکون عنده عربیة وما عندوش أخلاق .. تختاری إیه)

مش لازم تعملوا الفرخ فی فندق ٧ نجوم

(الناس ما بیعجبهاش مهما عملتی وحا یقعدوا یعایبوا علی فستانک

... ماله بیت بابا وماله السطوح ده حتی طراوه

مش لازم تعملي زي حسنية بنت عمك بالظبط كل واحد وله
ظروفه وجواباته واختياراته.

مافیش فارس أحلام حقیقی زي اللي فی خیالك وما عندوش قصر
ومافیش حصان أبيض ومافیش مملكة وغالبًا ما بیحفظوش شعر
.. وما عندوش سيف ومش بیحارب ..

والله ما حایخطفک

آه والله آه والله آه والله



سن العريس

مش لازم

مش لازم تشتري مية وخمسين فوطة وش

وأربعين طقم سرير

وعشر كوفيرتات

وعشر بطاطين

وست لحفة فايبر.

أصلا مش حاتستخدمي غير اتنين تلاته .

مش لازم ٢٤ كباية شاي شكل بعض

و٢٤ كباية مية شبه بعض

والكاسات اللي بترقص في الضوء لوحدها

والكبايات أم حرف ذهبي

والكبايات اللي بقها معوج

والصينية أم رجلين

ومش لازم طقم الشربات اللي مالوش لزمة

وأصلاً ما حدش بيعمل شربات.

مش لازم جميع مقاسات الحلل الألومنيوم والتيفال والطاسات

والصواني اختاري اللي حا تستخدميه بس أنت مش مهاجرة ومسافرة

موزمبيق لما تحتاجي تاني إبقى اشترى.

مش لازم حلل بايريكس وفيزون وسيراميك و\$#@&&^

مش لازم الشمعدانين والساعة اللي بيتحطوا على النيش من أول

الجواز هاتوهم حين ميسرة.

ساعة الحيط اللي بتعمل دينج دونج مش ضرورية عرفوا

أصحابكم وقرابكم محتاجين إيه وهم يجيبوها هدية.

عادي لو إتجوزتوا من غير ما تجيبوا الكاسيت الديجيتال أو

أبو سماعات كبيرة والميكروفون.

مش لازم غرفة الأطفال من البداية وممكن تسيبوا غرفه فاضية
وتقفلوا بابها إيه يعني ولو الضيوف سألوا قولوا لهم دي أودة الفيران.
ما تروحيش مع مامتك لبتاع البلاستيكات لأنه حايبيع لكم كل
المحل والحاجات مغرية..هاتي الضروري ورتبي أولوياتك.

مش لازم طقم الصيني

(الأساسي)

والأركوبال

(الإحتياطي)

والطقم الفاميه

(للمعارف)

والميلامين

للاستخدام اليومي

ركزي على الصيني وحاجات بسيطة للاستعمال اليومي.

مش لازم تشتري طن مكياج و٤ كيلو بارفان وكرتونة

إكسسوارات وجردل مونوكير إرحمي بابا وماما شوية.

مش لازم تفصلي دستتين فساتين

وتشتري دسطة بيجامات شتوي

ودسته صيفي

وشباشب وقباقيب

وشنط وصنادل وكوتشيات

وشوية عبايات

أصلاً وزنك حا يزيد ممكن حاجه بسيطة أو حا تضربي خالص

فخسارة الهدوم استني شوية.

بلاش طرح كتييييير.

بلاش مفارش مالهاش لزمة.

مش لازم حفلة في الخطوبة وحفلة في الشبكة وحفلة في كتب

الكتاب وحفلة في الزفاف ... خلي كله عائلي والحفلة واجتماع

الناس يوم الزفاف.

مش لازم كل الهدوم تبقى جديدة خدي هدومك القديمة معاك ما

حدش حا يحاسبك.

مش لازم تفتحي الدولاب والنيش وكل حاجه والناس تتفرج
وتعرف كل حاجه عندك وتطلع تحكي بره دي خصوصيات
وعادة سيئة عاوزين نبطل نعملها.

إعرفي ظروف والدك المادية

أو مامتك لو هي اللي بتصرف في حالة وفاته

وحطي حدود

واكتبي بالورقة والقلم ورتبي الأولويات

في حاجات لازم تشتريها تبقى أولويات.

وفي حاجات ممكن تأجلها

وفي حاجات ممكن تتلغي خالص.

وخصوصًا لو لك إخوات أصغر منك.

إرحمهم وخليك عاقلة

وارحمي عريسك برده وتوافقي معاه على حاجات الشقة واختاروا
المتوسط سعره وإرضي ووافقي حسب ظروفه لأن وراه حاجات كتير

فولاء النيش

النيش اللي قاعد زي الأروبة وساند بظهره على الحيطه

طلع له فوايد

أيون

أنا فكرت وقررت أكسر التابلوهات وأحطم الأصنام والقوالب

وأجدد كدة علشان نشوف النيش من منظور جديد

بصي يا ستي

ممکن لو نفسيتك تعبانہ تتفسحي لحد عنده وتلمعية حا تتحسني

وأنت بتمسحي صواب ولادك اللي علمت عليه وهم لازقين مناخيرهم

على الإزاز وتحسي إنك بتتخلصي من مشاكلك وصفاتك السلبية

(بس بلاش تركزي قوي وتبحلقي وأنت بتلمعي لأنك بتتحولي)

إتشجي وافتحيه..

ولا يهمك وطلعي ...

عارفة طقم الشاي اللي برجلين

آه والله كل فنجان له رجلين تحطه على الطبق تلاقيه واقف

حاطط إيده في وسطه وبيطلع لك لسانه

طلعي له لسانك أنت كمان وقوليله لو شاطر يمشي لحد الحوض

ويغسل نفسه ويجري على النيش ويرجع مكانه ..

أيون ما حدش أحسن من حد.

عارفة الصينية الفضة اللي بتقدمي فيها العصير للضيوف لو اتهزت

منك ووقعتي نقطتين سيبيهم قاعدين واجري نشفيها بتي شيرت

جوزك الأديداس لو مزعلك

وبكدة حا تفرغي الشحنات السلبية اللي عندك وتتشحني بطاقة

إيجابية.

طقم الشربات ليه ما اسمهوش طقم السحلب أو التانج بالفراولة

ماحدث دلوقتي بيعمل شربات ولازم تغيري إسمه وتثبتي وجودك
وتحطي بصمتك.

وقدمي فيه الشاي لجوزك بعد ما يتغدى وإبتكري أفكار جديدة.

طقم الخشاف مين اللي إداله أهمية علشان نعمل له طقم!

وليه ست سلطانيات بس!

إفرضي جالك سبع ضيوف نعمل إحنا إيه بقى؟

نحط له الخشاف في كباية!

مش عيب

وبعدين ماله الرز بلبن؟

ماهو ابن ناس ومن عيله كبيرة ارستقراطية إوعي تسمحلي للخشاف

إنه يتجاوز حدوده..إتمردى واكسري سلطانية وخليهم خمسة

وحطي فيه مهلبية

وسيطري يا مدام أنت مش شوية برده.

الكاسات البوهيمي الغالية اللي علشان تنبهري وأنت بتشربي العصير

قال إيه ...علشان الخطوط المشغولة في الكاس بتختفي لما تصبي

العصير وبتعمل انعكاس للضوء وتشوفي ألوان الطيف وأنت بتبلعي

سيبك منهم وإشربي فيها شاي بلبن واعملي حاجة جديدة

البتاعة اللي مالهاش إسم

اللي مامتك ورشتها من جدتك وجدتك ورشتها من جدتها

ما تديهاش لبنتك كفاية حرام عليكم يا مفترين

مش حلوة على فكرة

خديها على الحمام واقلبيها طشت غسيل

مش قلت لكم مفيد

وبيساعد على تطوير شخصية الزوجة

هو إحنا ليه بنعمل في نفسنا كدة

وليه بنشتري الحاجات دي

افتحوا النيش



إحترس من المهلبية

المهلبية هي علاقات هلامية جيلاتينية
على شبكة التواصل المجتمعية
وبتلاقيها ملخبطة وفيها حاجات بتمشي وكلا كيع
لأنها صحوبية بين اتنين في شات ورسايل مستخبية
وتالتهم شيطون الخناس
وتعالوا نشوف مثال:

مهلبية سادة

- جوجو وتيتي

اللي هم (جابر) وفتحية

ودول بيجبوا بعض من سكات على الفايسبوك وفاكرين إن

ماحدث واخذ باله

هو يحط صورته بالقميص المشجرة وهي

like

وهي تحط صورتها بالعباية البرتقاني أم كسر وهو

.like

والكومنات بتسيح خالص وفي رسايل خاصة

وبابا قاعد يدفع فواتير الإنترنت وماما فاكرها بتذاكر

وبعد الشات اللي كله حب بيقول لها

لا إله إلا الله

وبتقول له:

محمد رسول الله

مهلبية بالآيس كريم:

- فيفي متجوزة وعندها ٣٨ سنة

ورامي ٢٥ سنة

(هي تقول له ياخشي كميعة وحا اشوف لك عروسة ...

وهعههع .. وديجي ديجي دو)

على فكرة

هو مش زي أخوك الصغير

ولا ابنك

وحا تتزحلي قصدي تنزلي في الشات وممكن تتكسر رقبتك.

مهلبيه بالمكسرات

- حمادة متجوز وشوشو متجوزة

والشيطان بيزحلق هنا خالص

وممكن حمادة يقعد يكتب بالساعات

لشوشو علشان عندها مشكلة مع جوزها

أصله جرح شعورها لأنه بيأكل البطيخة مراكب مراكب مش

مكعبات بالشوكة وبتفضفض لحمادة وهي ساندته على المكنسة

ورابطة راسها بالإيشارب الأخضر وبتعيط

علشان بتثق فيه

وحمادة غرقان في المهلبية وفاكر نفسه بابا ضياء بتاع برنامج

ماذا تفعل لو كنت مكاني

وقاعدة بالبيحامة الكاستور المقلمة وشعره منكوش وبيكلمها

على الشات وسايب مراته دمعتها على خدها ...

طب مش تشوف نفسية مراتك الغلبانة الأول

واللي حا تتسأل عليها قدام ربنا.

طب اصدقتي الحبيبة شوشو

تعالى يا طماطم وفضفضي معايه أنا واخواتك

معانا أم البنين وأم البنات وأم محمد وأم عبد الهادي وأم فوزي

وأم فتحي

وفاضل لنا أمانا الغولة ونبقى كملنا الطقم

وممكن نعمل جروب ونسميه

(فضفضي براحتك ياختشي

وممكن لو جوزك اتجوز عليكى نساعدك ونقيم الليل وندعي

عليه سوا كدة من قلبنا . ق .. قصدي ندعي لكم

ما تفضضي لواحدة ست أهي حونينه برده

هو لازم راجل!

بلاش المهلبية

وخليكي في الرز بلبن

وتعالى فضضي لإخواتك

إحنا حانريحوكي يا شابة

إمضاء

ريا وسكينة

أأ .. قصدي أم البنين



تردد

ألو أنا تامر حضرتك

أَهْلًا وَسَهْلًا (أُوسْتَاذ تَامِرِ) طِلْبَاتِك؟

عاوز عروسة

إن شاء الله تلاقى طلباتك عندنا تحب تقول مواصفات معينة

واللا تسمع العرض الخاص

قولي يا ستي العرض الخاص خلينا نسمع.

عندنا عروسة على الزيرو بكرتونتها خمس برامج

غسيل وطبخ ومكوة وكنس وتنفيض سجاجيد من غير صوت ما

بتكلمش ولا بتشتكي بتكتب وتقرأ ومثقفه جمالها نسبته

خمسة وسبعين في المية

عليها خصم عشرين في المية

وضمان ست شهور ممكن تغير رجليها أو ودانها

ومعاها راس ودراعات هدية

وسعرها @#^&&\$# جلم

بس:

بصي حضرتك أنا عاوزها شكلها حلو وزى القمر

وشعرها ناعم وبتحط مونوكير وبتغني وترقص وتسقف

والجمال بنسبة مية وتسعين في المية علشان أغض بصري وكدة.

ما تقول كدة يا فندم عندنا عروسة شقراء بيضاء رشيقة ثلاث

برامج نانسي وشاكيرا وهايفا فول أوبشنز

وتقنية عالية وكومبيوتر

بس دي من غير ضمان يا فندم ولازم كاش ...

سعرها #5\$67^* جنيه بس:.)

لأ دي غالية أوي .. طب ممكن تقسيط :)

لا يا فندم سوري جدًا أصل النوع ده مطلوب في السوق ... كل الشباب

عاوزها كدة

طب أمري لله أعمل جمعية واقبضها الأول وأبيع التوكتوك

واستلف من ابن خالتي علشان خاطر عيونها.

طيب ممكن حضرتك تمليني مواصفاتك علشان أدخلها على

الكومبيوتر ونملا البيانات سوا أو تشرفنا قبل الاستلام علشان

العروسة تتفرج عليك.

ليه كدة بس ... طب ينفع أبعت صورة.

لا يا أستاذ تامير موضوع الصور ده جربناه والنصب فيه كثير

بيبعوا صور فوتوشوب والعرايس بتتسرع بعد ما تطلع من

الكارتونة لازم تشرفنا.

طيب خدي مواصفاتي ... أنا طيب وأمير وابن حلال وباشتغل وعندي
تكتك وحا أجيب لها غوايش وسلسلة وتحمد ربنا بقى
عفوًا ... قاطعت حضرتك إحنا عاوزين مواصفات شكلك بدقة
أكثر.

يووووه ... أنا طويل تقريبًا وكنت رفيع بس صحتي راده اليومين
دول وعيوني سودة وشعري دمه خفيف شوية ووداني ودودة وبتسلم
على بعضها.

يا فندم عاوزين دقه أكثر .. الطول الوزن الكرش ودورانه لون
البشرة لون عيونك شعرك ناعم واللا ليفة عرايسنا ليهم شروط
برده

ليه يعني ده الراحل ما يتعايش أنا بس اللي اتشرط يا شركة ...
يبقى لازم تشرف عندنا.

خلاص برمجوها وحددوا لي معاد

طيب حضرتك نفس الأخلاق مع أوبشن شاكير؟

؟؟؟؟؟؟ أنا متدين بطبعي؟

هههه عسل يا فندم عسل ... طيب نفس التكاليد والعادات؟

؟؟؟؟؟؟ علشان حا تعيش مع أمي أنا عاوزها محجبة ومتدينة

وحافضة القرآن.

مممكن طبعا تتبرمج ولا يهكم في طلبات تانية؟

آه طبعا.. عاوزها تطبخ أحلى أكل وخصوصا الحلويات وتغسل وتنظف أصلي متعود على النظافة وتكوي لي هدومي وترتب لي حياتي من الآخر ست بيت ممتازة.

آخ ... للأسف يا أستاذ تامير ... أوبشن شاكيرا ما بيتبرمجش مع شغل البيت والبهذلة علشان المونوكير آسفة جدا عروستك مش عندنا باي باي.

يا خسارة كان نفسي في عروسة حلوة



أُسْبِ، تَعِينِ عَلَيَّ فَخُضْ (بِصْر

ركزوا كدهون

علشان تقرب من ربنا

الأبْهَات

مش لازم تسأل على مستوى ابنك الدراسي كل يوم ورايح جاي

ع المدرسة ... عرفنا إنك أب صالح

كفاية

(الأبلة حلوة وبتحط روج)

ومراتك الغلبانة بتحل الواجب وطالع عينها.

الشباب

وأنت ماشي في الشارع بص على جزمتهك وعد بلاط الرصيف

وما ترفعش راسك إلا وأنت بتعدي الشارع بس

الناس حا تفتكرك مفكر أو كاتب وكدة وحا تتشهر بعد فترة

بإذن الله.

(قول يا رب)

البنات

خليكي خجولة وبصي في الأرض ودوري وبحلقي

يمكن ربنا يرزقك وتلاقي جنبه هنا واللا هناك

حا ترزقي إن شاء الله

المثقفين

لو أنت ما شاء الله مثقف ومتابع النشرة

أو برنامج حوارى من دول

والمذيعه حلوة

ركز في شريط الرسائل

مسلي وجميل وبيحكوا حكايات

بلاش تنقل نظرك مباشرة من على وش المذبة

وتبص لمراتك فجأة

إديها فرصتها دي غلبانة ولسه غاسلة المواعين

ونفسيتهأ تعبانة

بص للنجفة لحد ما المذبة تمشي وأمرك لله.

الستات

ركزي على الكرافة بتاعة المذيع أو ودان البطل

لو متابعة مسلسل

وبالمتابعة حا تعرفي مين بيكرر الكرافات ومين ودانه كبيرة

ودي تمارين للذاكرة

وبلاش تركزي مع إيدين فيصل القاسم علشان حا تدوخي

وممكن تتحولي

بس مش مشكلة.

النضارات

لو أنت بتلبس نضارة أبشر

افلح النضارة واتفرج وإدعيلي

حاتشوف طشاش بس حا تبقى سامع كويس ما تقلقش.

(اعتبره راديو أجدادنا كانوا عايشين من غير تليفزيون

وكانوا زي الفل)

العائلات

لو المشكلة في جوزك ومتابعين مسلسل تركي

خلي حركاتك سريعة

أول ما البطلة تيجي إخطفي النضارة

وقولي بصوت مصطنع رقيق تصحبه نبرات الحنان

واحذري من نظراتك:

الله يا حبيبي

باحب شكلك من غير النظارة

حا يفرح بنفسه وينسى البطلة.

(مؤقتاً)

الرياضيين

بلاش تتابع الأولمبيكيات

أيون

وتعمل رياضي

في جمباز وبنات ومايوهات

وأنت كنت عارف من الأول ... يبقى قاصد وسيئاتك حا تزيد

تابع كل الألعاب الثانية وبلاش دي.

(وأنتِ إلغي القناة وجوزك في الشغل)

ربات البيوت

لو لقيتي واحدة من بتوع

سيداتشي آنساتشي ساداتشيبي

إخطفي الريموت ما تسكتيش

وهاي سبيس تون للعيال.

إشتري له جرايد

القراءة للجميع

وخدي بالك من جوزك

مش لازم قناة فتافيت طول النهار..

لأن اللي بيضرفتوا ويفتتوا ويتفتفتوا

ستات ومنتشورين ولايسين

وأنت ماسرحتيش من أول إمبراح

الزهقانيين

بلاش برامج الرياضة للجميع بتاعة كابتن سماسم اللي لابسين

استرتش دول وبيقفوا صفين

وبيتنططوا ويترقصوا

قال إيه تمارين للمفاصل ووجع الظهر والرقبة

عيب كدة

وأخيرًا

ما تبصش للحرام

علشان تعرف تشوف ربنا

وتفتح عينيك في الحلال



كلم لكذبين

أيون مكذبين ...

ركزوا معاية

لحد إمتى حاتفضلي حساسة؟

ولحد إمتى حضرتك حاتزعل!

سيبك منهم وحب نفسك وحب نفسيك؟

ماهو لو فضلت قاعد في عزلة وحاطط إيدك على خدك

وما بتقابلش حد

أنت بس اللي حاتتوجع.

أنت بس الخسران

حاتحرم نفسك من الحياة وتفضل منتظر نجاح الريجيم.

مكسوف من نفسك ليه ... هو الطخن حرام!

ما تتكسفش إلا من حاجة حرام

ممنوع الاكتئاب

ممنوع الحزن

ممنوع إنك تتقمص لو حد قال لك اللبس ده مش مناسبك وخصوصا

لو من عيلتك خدها بروح رياضية

اضحك معاهم

لأنهم بيحبوك وفكر في رأيهم.

إلبس لبس واسع وشيك

إعرف إزاي تداري عيوبك **

بلاش بنطلونات ضيقة يا طماطم

وبلاش القميص والبدلة الضيقة يا بطاطس

عارفين رجاء الجداوي ... عارفينها .. صح

طول عمرها شيك!

عمر ما طخنها منع إنها تلفت نظرنا بشياكتها ولبسها ولونه

بتعرف تخبي عيوبها

إلبسي اللي يناسب جسمك وانبسطي مع البنات ... وعقود بقى

وإشارات وعيشي حياتك

ولما تخرجي حافظي على الحجاب.

عيش حياتك وبلاش تزعل

على فكرة دمكم خفيف

ما اعرفش ليه بس هو كدة

الطخان زي العسل وروحهم خفيفة

لو حبيت نفسك وتقبلتها

حا ينجح الريجيم

آه والله

وحا يبقى سهل ... زي مبولكم كدة

لأن معنوياتك مرتفعة

ولأنك فرحان ومرتاح نفسيًا

عزيمة بقي وإصرار وكدة

ما هو لازم برده ننظم أكلنا علشان صحتك أصل الصحة نعمة

خلاص

من النهارده لازم تضحك

بص لنفسك في المراية وكلمها

قول لها أنا بحبك وحاساعدك

ابتدي رجيم وكافئ نفسك كل أسبوع مرة.. واكتب لنفسك لما

تخس كلام جميل

امشي كثير وسبح واستغفر وأنت ماشي

ولو مرة حد سخر منك أو زعلك كبر دماغك وما تنساش تقول له:

موتوا بغيطكم

مكملين

وعلى رأي المثل

البنت اللي ملهاش حدود ملهاش وجود



رمضان كريم يا ستين

- الستات والبنات

اللي رايعين يصلوا التراويح

في رمضان القادم

إن شاء الله

(لو ما اتمنعتش واللا حاجة)

بلاش علبة الكيك وصنية الكنافة

وترمس الشاي مش لازم تاكلوا بين الصلوات كلوا لما تروحوا.

(عارفين إنك شاطرة)

بنتك الصغيرة فرحانة بصوتها

زي أصالة وماجدة الرومي

وبتغني في المسجد وتنط على راس البنات وأنت بتصلي
وابنك اللي بيسنن سخن وبيصرخ الظاهر سنانه بتاكله والناس
مش بيسمعوا الإمام.

(اتفقي مع جارتك أنت تصلي في المسجد يوم وهي يوم واقعدوا
بالولاد وارحموهم)

مافيش حاجة إسمها محجوز ما تحطيش الشنطة جنبك وترقي
للبنات وتقولي محجوز

وتستن جارتك على بال ما تخلص المواعين وتيجي
(المسجد مش أوتوبيس)

بالنسبة للغبانة اللي جنبك

مش لازم صباeck الصغير يلزق في صباها لو بعيدة وبطي
ترغزغيها.

رجليك كدة غلط وشكلها وحش.

(مش حاتستحملي وحاتقعي في الآخر)

ما تطلعيش تجري بعد الصلاة بالخمار علشان تلحقي المسلسل

من أول المقدمة وتتفرجي على الرقاصة.

(فايدته إيه مرواح المسجد)

بلاش تلبسي العباية اللي بتلمع

وتبرق بالترتر والخرز

لأنها بتنور في الضلمة والناس بتتخض.

(ده مش لولولويييي فرح)

بلاش تنزلي تصلي بالإسدال بتاع البيت

قماشته خفيفة وببين الجسم

ألبسي أحسن عباية عندك

(أنت مش طالعة تنشري في البلكونة يا شلبية)

بطلي تبجلقي في البنات

وتدوري لإبنك على عروسة وتنادي عليهم بصوت عالي.

(بصي من تحت ل تحت)

وأوصيك بالبنات الهادية اللي مش حاطين مكياج وبيقعدوا ورا)

جاركم أبو أيمن عرف كل حاجة لأنه سمعك في المسجد

من ورا الستارة

وأنت بتحكي لصاحبتك على مقادير الكنافة بالقشطة

والمكسرات

(حا يقول لمراته وحاتعرف سر المهنة وطبي صوتك)

بلاش يا بنات الكعب العالي

لأنه ملفت ... وبيعمل حاجات وحشة.

(تريك تراك تريك تراك قدام المسجد والإخوة واقفين حا يبصوا

غصب عنهم ويتفرجوا)

روج وكحل وأحمر خدود

وأنت رايحه تصلي ..

ليه!

(يا رب الإمام يخشع في الدعاء وتعيطي والكحل يسبح)

البارفان بلاش منه

وعلى فكرة ما فيش واحد حا يشمه يقوم يحبك فجأة
ويجري وراك وأنت طالعة من المسجد علشان يخطبك من بابا
(اللي بيعي في الإعلانات كله كذب)
لو الفطار كان فيه فته وخل توم خليك مكانك ما تتحركيش
من البيت وهاتولها هدية
آميين
الرجال اللي يعلوا صوتهم فيها
أنت صوتك حلو وناعم ومسمسم
وده مسجد
وبلاش أوبرا عايدة
قولها بصوت واطي
علشان ربنا يكرمك
في السجود إدعي في شرك
المسجد كله عرف إن ركبك بتوجعك وجوز أختك ضربها بالقلم
وإنك بتدعي عليه

بطلوا تتعاركوا على النور وشوية تطفوه علشان الخشوع وشوية

تنوره وتدوروا على العيال

وما تنسوش تنضفوا المسجد وبلاش ترموا مناديل ورق في الأرض

علشان

ده بيت ربنا.

وحشني رمضان.

اللهم بلغنا رمضان



رمضان كريم لدرجال

بمناسبة رمضان

الإخوة والشباب اللي رايجين يصلوا في المسجد

ما شاء الله ربنا يزيد ويبارك

ممنوع منعًا باتًا تروح المسجد؟ بالشراب اللي كنت لابسه طول
النهار

واتعمى تراب وبعدين مسحت عليه والمية والتراب والهوا عملوا

جريمة أنت كدة «طاغية»

في ناس غلابه بتصلي في الصف اللي وراك

وممكن تحصل إغماءات واعتقالات.

في إختراع اسمه «عطر» وأحيانا يدعى «بارفان» وبينادوه في بعض
العائلات «كالونيا» ... يا ريت تستخدمه علشان تسعد الناس وتداري
الأحزان.

الصنادل والشباشب اللي بتركّن على باب المسجد بطريقة عشوائية
وتكعبل اللي رايح واللي جاي
وفي الآخر تتعاركوا على الشباشب اللي شبه بعض وأنتم مروحين
رصوها بنظام ... كل ششبب جنب أخوه علشان الزحمة
ولو ما فيش مكان ممكن الصندل يركن صف تاني
وممكن حد من الشباب يتطوع وينظم المرور
اللبس اللي حضرتك قاعد بيه طوال النهار (التريننج المخطط)
ونمت بيه، وصحيت بيه، وأكلت إبنك حمادة بيه، والشورية وقعت
عليه وبقعته، ما ينفعش تروح بيه المسجد لأن ريحته طبيخ وعرق،
إلبس أحسن لبس عندك وأنت رايح المسجد.
لو مدام «شلبية» أبدعت في الفطار النهاردة،
وفي قنابل ومتفجرات في المحشي يبقى أنت «إرهابي»،

والكوارع كَأنت ممتازة والخل والتوم والفتنة كانوا حكاية
بلاش تنزل

أو أجلهم بعد التراويح رفقا ورحمة بالمصلين

إنزل بدري مش لازم تتأخر على بال ما برنامج المسابقات يخلص أو
شيكابالا يجيب جون والإمام يكون بدأ الركعة الأولى ودخل في
السورة اللي بعدها، وتجري في الشارع علشان تلحقه قبل ما يركع،
رمضان مش بيعي كل يوم وكدة كدة مصر مش ها تلعب في
كاس العالم ريحوا نفسكم.

الشباب الصاعد، بلاش البنطلون الهابط، والسلسلة والأنسيال، وبلاش
تلبس ال تي شيرت اللي عليه صورة مادونا وأنت رايح تصلي التراويح
أكيد لازم تركز العربية وتلحق الصلاة بس بلاش في وسط الشارع
الناس ها تدعي عليك، وممكن حماتك تتعب والإسعاف تيجي
ويكونوا عاوزين يعدوا من الشارع ده تحديدا لإنقاذ حياتها بعد ما
ضربت صنية الكنافة لوحدها والسكر علي، إركانها بعيد أو روح
مشي وما تضايقش الناس وتسد الطريق، وساهم في إنقاذ حماتك.
بعد ما تصلي وحضرتك واقف منتظر المدام مش لازم تبين لها إنك

قلقان عليها قوي وبتدور عليها في وشوش كل الستات، وقال إيه
باعرفك من العباية اللي أنت لابساها يا شلبية، ومن شوقك ليها
بتبص علشان بس تعرف هي مين، هي واضحة جدا بالعباية المشجرة
أم كسر والشبشب البرتقاني

بلاش تبخلق وتبص قوي وتدور عليها هي ها تلاقيك ها تلاقيك ...
وبترافبك على فكرة

علشان الأخوات بتتخرج ولازم تغض بصرك.

إبنك اللي واخده معاك تعلمه الصلاة وهو لسه لا يعقل، دخله الحمام
قبل الصلاة علشان ما يجيش في وسطها ويقول لك (عاوز أروح
الحمام) والناس تضحك وتروح طالع من صلاتك وتجري بيه،
وطبطب عليه وفهمه، لو عمل دوشه وحد بص لك شذرا وقال لك
سكته بلاش تديله بالبونيه وتنزل فيه ضرب، وخليه يبطل
يزغزغ الناس في رجليها وهي ساجدة وممكن لو حد قال لك حاجة
تبتسم وخلص.

الراحة اللي بين الركعات الإمام بيقول نصيحة قصيرة لو شفت
أستاذ كمال اللي ساكن في الشارع اللي وراكم مافيش داعي تنط

من فوق رقبة اللي قاعدين وتاخذه بالحضن وتسأله عن سوسن هي
خلاص إتجوزت وها تولد وألف مبروك، وأقعد إسمع الإمام.
اعمل الموبايل صامت، أو طففيه خالص واكتمه، وما تطلعوش تلعب
Games بين الركعات ولا تبعت رسايل لحد، وبلاش رنة نانسي
عجزم في المسجد،

ويا خوفي ... يا خوفي لتكون الرنة بشرة خير
وكل سنة وأنتم طيبين



تَبْكِييْلَم تَبْكِي تَبْكِي

استيقظت على صوت جرس هاتفها النقال، وكان هو المتصل،
أخبرها بحنان أنه في الطريق إلى البيت وطلب منها أن ترتدي ملابسها
وتتأنق هي والأولاد، فرحت وقفزت من فراشها فهي فعلا تحتاج
للخروج فالأسبوع كله كان ضجيج، اختبارات الأولاد، وتنظيف
الشقة استعدادًا لرمضان، غسل السجاجيد وأشياء أخرى.

فووووم فوووم، فررررووووم

وصل في موعده بابتسامته الساحرة وسيارته العجيبة
وكانت في منتهى الأناقة، العباءة والطرحة والحقيبة الفاخرة
والحذاء اللامع، وركبوا معه.

مروا أولاً على بيت أمها فصعدت وحدها وسلمتها الأبناء، ونزلت

بسرعة وهي تطير كالفراشة، استقبلها بابتسامة هائلة وقاد سيارته

بتهور وكأنه شاب مراهق!

بدأ يضحك ويغني ويهمهم ويحدث نفسه ...

لم تفهم منه شيئاً.

سألته وهي تتعجب:

هو إحنا رايعين فين يا حبيبي؟

أجابها وهو يبتسم إبتسامة مأكرة:

مفاجأة. ^^

تسارعت دقات قلبها وأخذت تفتش في ذاكرتها عن تاريخ اليوم

هل هو يوم ميلادها لا

هل هي الذكرى السنوية لزواجهما..

لا لا لا

إرتابت قليلا وابتلعت ريقها بصعوبة فهي لن تحتمل

ربما هي فعلا المفاجأة التي تنتظرها منذ سنوات»

وجبة غذاء أنيقة، في مطعم فاخر، على مائدة مستديرة، عليها
شموع، ووردة حمراء، وبطريقة رومانسية سيقول لها (زوجتي،
زوجتي، أنت حبيبتي أنت).

التفتت إليه وقالت بدلال وبضحكة خجولة لطيفة:

عرفت يا شلبي حا تغديني في مطعم سحتوت ... صح؟

أجابها وهو يدير زر الراديو باحثاً عن إذاعة الشرق الأوسط وقال
بصوت مخنوق:

لا يا شلبية ... كارفور عامل عرض على زيت كالا لا على كل
إزازتين كيلو رز هدية

قلت آخذك بالمرة نجيب لوازم البيت قبل زحمة رمضان.



صبغ مشرق

استيقظت على صوت المنبه فقمّت بنشاط، أحياناً أكاد أسمع صوت
مفاصلي الخشنة وركبي وهي تسلم على بعضها، أحاول تعديل
استقامة عمودي (الفأري)
وأألم قليلاً، لا بد أن السبب هو اللبن الرائع الذي أتناوله بطعمة
الجميل بعد أن تزيل الشرقة كل ما فيه من فائدة مرات
ومرات.. يعجبني شكل العلبة
فتحت صنبور المياه وغسلت وجهي بماء النيل المعكر الأصفر
الجميل
ومسحت يدي بملوثاته الرائعة واستمتعت بطعم الماء العجيب وأنا
أتمضمض..

تناولت إصبعاً من الموز المسرطن وتناولته ثم ضغط زر الغلاية

لأنتقم منها

وأبدأ يومي بقوة، اتخذت قراراً مفيداً وصنعت لنفسى كوباً من

الشاي باللبن الممزوج بمياه النيل التي ربما لو نطق الفلتر للطم

وحسب وحوقل مما فلتره منها

وأخاله سيدعو علينا كل يوم كلما شغلناه.

اقتربت من النافذة واستمتعت بالضوضاء اللطيفة فالشارع رائع

والسيارات تتوقف فيه من روعته أكثر من مرة وجميل أن تتأمل

وجوه الركاب المكفهرة وهم يستمتعون بالزحام والحر وعلى

وجوههم تتلأأ وتصطف قطرات العرق المملح.

أمامي بعيداً مدرسة إبني الجميلة والكبيرة والمشهورة لا أنسى أبداً

رائحة حماماتها المنعشة وأصوات المدرسين والمدرسات وهم يتابعون

أولادنا بأرق الألفاظ

وبأصوات رحيمة من حناجرهم المباركة.

وأكوام القمامة المبدعة المتكتلة في الطريق الجانبي إليها وأنا أسير

مع إبني رغم رقي المنطقة!

راقبت مرة رجل وامرأة،

يفتشان في القمامة بحثا عن الكنوز التي خبأتها الليلة لهما في طيات
الأكياس العبقريّة السوداء، يمزقان الأكياس، وينشرون البهجة أمام
المدرسة،

ويعبر من فوقها المارة بحنان.

تذكرت تجمع الأمهات كل يوم، قبل موعد انصراف التلاميذ
وكم هو مبدع مهرجان الأزياء الذي أراه كل يوم أتردد فيه على
بوابة المدرسة، ألوان بديعة، وبناطيل متعددة الأشكال مع طرح
مزرکشة، وطلاء الأظافر الأخضر المتناسق مع الطبيعة والحقائب
البديعة صحوة دينية ومنظر خلاب
ولفت نظري الجو العكر بسحره،

والغبار الجميل المنتشر في كل مكان.

رأيت الأشجار الخضراء، والتي بدت لي كعجوز لطيفة، في الستين
وقفت بهوان وعليها مسحة من الجمال الغير لافت للنظر، بعد أن
تساقطت أوراقها النضرة.

كم أنت جميلة يا بلدي الحبيبة، لا أدري لماذا يشتكون منك!

ترى هل سنستطيع الذهاب إلى المصيف هذا العام؟

تساءلت في نفسي .. فكم اشتاق للسير على الرمال المختلطة بالقمامة

وأقف وأنا أراقب الشاطئ الجميل وأمواجهة تحمل لنا زجاجات المياه

الفارغة التي ألقاها الناس فيه وبعض الأكياس والمناديل الورقية.

فتحت الفيسبوك وقلبت فيه، وقرأت مزيجًا من الأخبار الخفيفة بين

فيديو لصحفي معتقل فقد نصف وزنه ورأيت كيف تحلقت عيناه

بالسواد ووهن فليتهم يعتقلون كل من يزيد وزنه عن السبعين..

وبين لقطات مصور ماهر لإحدى القرى ليرينا طبيعة سكانها

الجميلة والعملية فقد استغنوا عن كل شيء من أثاث وطعام

ويختبئون في أشياء تشبه الكهوف الرائعة.

وخبّر من هنا عن زوجة لا تعلم أين زوجها حتى الآن فقد رأته آخر

مرة من تسعة أشهر على شاشة التلفاز ... يبدو أن هناك من يعتمد

إخفاء أخباره عنها لتشتاق إليه.

وخبّر من هناك عن شاب يبتسم وعرفت أنه الآن بإذن الله مشغول

بعمره في السماء.

سعدت جدًّا (جـدن) بقرب عودة التوفيت الصيفي الرائع

وسعدت أكثر بفرحة صديقاتي به

قرأت مقالات واستمتعت ببعض التشبيهات اللفظية

والاستعارات المكنية

والتصويرية والتمثيلية والتنوين والكثير من الإبداعات

وخاصة في الحوارات السياسية الخلافية

إبداع

أتابع بإعجاب الحب المنتشر بين أفراد الشعب، وألاحظ زيادة الوعي،

وإتساع مساحات التناغم بين التيارات المختلفة.

الواقع مبهج، وأنا متفائلة جدًّا فنحن نتغير للأفضل

الكثير من الدعوات تتصاعد يوميًّا، ومعظمها في السجود،

لكل من يسعدونا وأسعدونا بأفعالهم الرائعة..

وحسبنا الله ونعم الوكيل

● اللهم استجب ●

❏ دل ف ه رس ❏

- ممنوع الضحك ٥
- ١- احترس من المرأة ٦
- كنت فين ٦
- يا بختك ٧
- عاوزين إيه من زفتة ٨
- هاااااااا ٩
- الصمت ١٠
- عاوزة ورد يا إبراهيم ١١
- ربطة النينجا ١٢
- ٢- أفكار رومانسية ١٣
- ركزي معاية ١٣
- ابعتيله جوابات ١٤
- أخرجي معاه ١٥
- لما يدخل من الباب حسسيه إنك فرحانة ١٦
- حسسيه إنه غالي عليك ١٧

- ١٨ حطي فآزة فيها ورد
- ١٩ الإضاءة
- ٢٠ اعمليله مفاجأة
- ٢١ بلاش تستخبي ورا الستارة
- ٢١ علشان يقلق ويدور عليك . .
- ٢٢ إديله أكبر حطة في الفرخة
- ٢٣ ٣- الشبخة فيفي
- ٢٦ ٤- بعد ساعة ..
- ٢٧ ٥- حماتك
- ٢٧ ما تزعلش
- ٢٨ ما تزعلش
- ٢٩ ما تزعلش
- ٣٠ ما تزعلش
- ٣١ ما تزعلش
- ٣٢ ما تزعلش
- ٣٣ ما تزعلش
- ٣٤ ما تزعلش
- ٣٥ ما تزعلش
- ٣٦ ما تزعلش

ما تزعلش	٣٧
٦- سامح	٣٩
٧- وجع	٤٤
٨- عش الحب	٤٧
٩- حقك عليه	٥٢
حقك عليه	٥٢
١٠- المربحية بالفندقوش	٥٨
١١- حوار دسم جدًا	٦٥
(أفكار ملظظة)	٦٥
١٢- عريس إلكتروني	٧٢
١٣- منتهى الحب	٧٧
١٤- كيف تسعد زوجتك	٨١
١٥- ألو ... بحبك	٨٦
أيام الخطوبة	٨٦
(كتب الكتاب يعني)	٨٦
بعد الجواز	٨٩
١٦- شايفاك	٩٣
١٧- شايفك	٩٦

- ١٨- تعرفني إزاي إن جوزك يبحبك ٩٩
- في الركن البعيد العادي ١٠٣
- ١٩- جبر الخواطر ١٠٩
- ٢٠- عبارات تسمعيها من زوجك ١١٣
- ٢١- بوسي ١١٧
- ٢٢- مفاجأة ١٢٢
- شوية كلام ١٢٦
- ٢٣- عبقرية الستات ١٣٠
- ٢٤- الملافظ سعد ١٣٣
- مراتي مدوخاني ١٣٥
- وكل شوية تغضب ١٣٥
- وتروح عند أهلها ١٣٥
- أنا رحت للدكتور ١٣٧
- حاسة إن جوزي متغير من نحيتي ١٣٨
- يا طيبين ١٤٠
- ٢٥- عروسة المولد ١٤١
- ٢٦- فول الصين العظيم ١٤٤
- ٢٧- مبييين فيكن ١٤٦

١٤٦	٢٨- يا ستات مصر
١٤٨	٢٩- أهلاً أهلاً الزوار
١٥٥	٣٠- بنت ناس
١٥٩	٣١- مشية الستات
١٦٣	٣٢- حاجات ما تتسيش
١٦٦	٣٣- خواطر الأم المصرية
١٦٩	٣٤- الشاويش عطية
١٧٤	٣٥- غلطة
١٧٩	٣٦- نوع نادر جداً
١٨٢	٣٧- نصائح لأم العريس
١٨٨	٣٨- (لظلوطة الملظظة)
١٩٢	٣٩- يا بنوته
١٩٢	٤٠- لما يجيلك عريس
١٩٧	٤١- ست العرايس
٢٠٢	٤٢- فوائد النيش
٢٠٦	٤٣- إحترس من المهلبية
٢١١	٤٤- عروستك عندنا
٢١١	(خيال علمي)

- ٢١٦ ٤٥- أشياء تعين على غض البصر
- ٢٢٣ ٤٦- كلام للمكلبطين
- ٢٢٨ ٤٧- رمضان كريم يا ستات
- ٢٣٤ ٤٨- رمضان كريم للرجال
- ٢٣٩ ٤٩- تيكيبيلام تيكلم تيكلم
- ٢٤٢ ٥٠- صباح مشرق
- ٢٤٧ ٥١- الفهرس

مَشَّتْ

ممنوع الضحك

جرب أن تراقب طفلًا يضحك وستضحك
جرب أن تراقب نفسك وأنت تأكل المانجو وستضحك
جرب أن تراقب السعداء وستضحك
نضحك أحيانًا على أنفسنا
ونضحك أحيانًا دون قصد على أخطاء الآخرين
ويضحكننا الصغار ببراءتهم
والبعض ينتزع منا الضحك بتلقائية وفن
ونصاب أحيانًا بعدوى الضحك
عندما نضحك فجأة
فنحن نفتح أبواب السعادة لتتنفس أرواحنا
إهتزازات هلامية متتابة مع إحمراز في الوجهه
وضيق في العينين يعقبها صوت متقطع ودموع تسيل
سنصف مواقفنا نعيشها في حياتنا اليومية
من فضلك
اضحك معنا فأسنانك ليست عورة
ولا تصدق أبدًا أنه... "ممنوع الضحك"

حنان لاشين

ISBN 978-9778514124



٢٧ شارع دمشق متفرع من ميدان ساوارس

المعادي - القاهرة - مصر

www.alqimari.com

daralqimari

دار القمي
للنشر والتوزيع

نم احافه الرفع بواسطه

مكتبه عملك

ask2pdf.blogspot.com